




廣州府志

ル 5
1212
28





門 56
號 1212
卷 28



廣州府志卷七十五

前事略一

秦

漢

後漢

陳

晉

隋

秦

始皇三十三年發諸嘗逋亡人贅壻賈人略取陸梁地為桂林象郡南海以適遣戍

史記秦始
皇本紀

謹案郭通志以置南海郡為始皇二十六年事與史記不同不知何本考史記尉佗傳言秦并天下畧定揚越不言某年但云與越雜處十三歲其下文云至二世時南越尉任囂死云云自二世元年上數十三歲為始皇二十六年正合秦并天下之歲故舊志以為始皇二十六年置南海郡也徐廣注云秦并天下至二世元年十三年并天下八歲乃平越地然則徐

廣之意亦以置郡為三十三年事矣大抵史記紀傳間有不同終當以本紀為是茲特從阮通志更正而附辨於此

三十四年適治獄不直者築長城及南越地史記秦始

秦皇使尉屠睢發卒五十萬為五軍一軍塞鐔成之嶺一

軍守九疑之塞一軍處番禺之都一軍守南野之界一軍

結餘干之水與越人戰越人皆入叢薄中莫肯為秦虜相

置桀駿以為將而夜攻秦人大敗之殺尉屠睢淮南子

秦使尉佗屠睢將樓船之士南攻百越使監祿鑿渠運糧

深入越人遁逃曠日持久糧食絕乏越人擊之秦兵大

敗秦乃使尉佗將卒以戍越史記主父偃傳嚴安上書

屠睢無佗字 漢書嚴助傳淮南王安上書畧同

謹案屠睢事不知在何年郭通志繫屠睢攻越於始皇二十九年繫越人殺屠睢於始皇三十二年此臆斷之詞耳今採掇其事畧見於此又監祿韋昭史記注曰監御史名祿張晏漢書注與韋昭同而地志多稱為史祿考太平御覽采臨桂圖經云灘水昔秦命御史監史祿自零陵下灘水是也文苑英華魚孟威桂州重修靈渠記云靈渠乃海陽山水一派也謂之灘水焉舊說秦命史祿吞越嶠而首鑿之是唐人亦以史祿連讀矣

漢

漢高祖元年冬十月五星聚於東井漢書高祖紀

任囂觀天文曰秦方喪亂此南越偏霸之象也黃通志引南越志

南海尉任囂卒趙佗代為尉舉兵絕道殺秦所置長吏擊并
桂林象郡黃通志

南越

班固漢書越作粵

王尉佗者真定人也姓趙氏秦時已并天

下畧定揚越置桂林南海象郡以謫徙民與越雜處十三

歲佗秦時用為南海龍川令至二世時南海尉任囂病且

死召佗語曰聞陳勝等作亂秦為無道天下苦之恐盜兵

侵地至此吾欲與兵絕新道索隱曰案蘇林云秦所通越道自備會病甚

且番禺負山險阻南海東西數千里可以立國郡中長吏

無足與言者故召公告之即被佗書行南海尉事囂死即

移檄告橫浦陽山湟溪關曰盜兵且至急絕道聚兵自守

因稍以法誅秦所置長吏以其黨為假守秦已破滅佗即

擊併桂林象郡自立為南越武王史記南越尉佗傳

謹案趙佗成越史不言其在何歲據史記主父偃傳

載嚴安上書云使蒙恬將兵以北攻胡又使尉佗屠

睢南攻百越錢大昕史記考異云漢書無佗字疑衍蒙恬攻胡事在始

皇三十三年則尉屠睢攻越似亦三十三年事屠睢

兵敗秦乃使尉佗成越則尉佗至越當在三十二年

後而漢文帝元年佗上書云老夫處粵四十九年自

文帝元年前數四十九年為秦始皇二十年是荆軻

刺秦皇之歲也其時秦尚未滅齊楚趙魏諸國佗無

由先至粵中考王翦傳稱虜荆王負芻平荆地為郡

縣因南征百越之君王翦滅楚在始皇二十四年意

其前於二十年已先略定百粵而史未及詳載耶疑

莫能明存以俟考

高帝五年二月詔曰故衡山王吳芮與子二人兄子一人從百越之兵以佐諸侯誅暴秦有大功諸侯立以為王項羽侵奪之地謂之番君其以長沙豫章象郡桂林南海立番君芮為長沙王

漢書高祖本紀

謹案阮通志宋史記高祖功臣表九年三月封須毋

陸量侯如淳以為即始皇紀陸梁地然境土所在無

考今不錄

十一年五月詔曰粵人之俗好相攻擊前秦徙中縣之民南方三郡使與百粵雜處會天下誅秦南海尉佗居南方長治之甚有文理中縣人以故不耗滅粵人相攻擊之俗益止俱賴其力今立佗為南粵王使陸賈即授璽綬佗稽首稱臣

高祖本紀

高祖使陸賈賜尉佗印為南越王陸生至尉佗雖結箕倨見陸生陸生因進說佗曰足下中國人親戚昆弟墳墓在真定今足下反天性棄冠帶欲以區區之越與天子抗衡為敵國禍且及身矣且夫秦失其政諸侯豪傑並起惟漢王先入關據咸陽項羽倍約自立為西楚霸王諸侯皆屬可謂至彊然漢王起巴蜀鞭笞天下劫畧諸侯遂誅項羽滅之五年之間海內平定此非人力天之所建也天子聞君王王南越不助天下誅暴逆將相欲移兵而誅王天子憐百姓新勞苦故且休之遣臣授君王印剖符通使君王宜郊迎北面稱臣迺欲以新造未集之越屈彊於此漢誠聞之掘燒王先人家夷滅宗族使一偏將將十萬眾臨越則越殺王降漢如反覆手耳於是尉佗迺蹶然起坐謝陸

生曰居蠻夷中久殊失禮義因問陸生曰我孰與蕭何曹參韓信賢陸生曰王似賢復曰我孰與皇帝賢陸生曰皇帝起豐沛討暴秦誅楚為天下興利除害繼五帝三王之業統理中國中國之人以億計地方萬里居天下之膏腴人眾車轡萬物殷富政由一家自天地剖泮未始有也今王眾不過數十萬皆蠻夷崎嶇山海間譬若漢一郡王何乃比於漢尉佗大笑曰吾不起中國故王此使我居中國何渠不若漢迺大悅陸生留與飲數月曰越中無足與語至生來令我日聞所不聞賜陸生橐中裝直千金他送亦千金陸生卒拜尉佗為越王令稱臣奉漢約史記陸賈傳

十二年二月詔曰南武侯織亦粵之世也立以為南海王文

日高祖五年以象郡桂林南海長沙立吳芮為長沙王象郡桂林南海屬尉佗未降遙虛奪以封芮耳後佗降立佗為南

越王自此王二郡芮惟得長沙桂林零陵耳今復封織為南海王遙奪佗一郡織未得王之 漢書高祖本紀顏師古注

謹案續漢書郡國志交阯郡羸陟劉昭注引地道記

曰南越侯織在此此南越侯織即南武侯織也既在

羸陟則所謂立為南海王者非王南海郡地蓋即王

交阯郡地耳謹附辨於此

惠帝三年七月南越王趙佗稱臣奉貢漢書惠帝本紀

高后五年春南越王尉佗自稱南武帝高后紀

高后時有司請禁南越關市鐵器佗曰高帝立我通使物

今高后聽讒臣別異蠻夷隔絕器物此必長沙王計也欲

倚中國擊滅南越而并王之自為功也於是佗乃自尊號

為南越武帝發兵攻長沙邊邑敗數縣而去焉高后遣將

軍隆慮侯竈往擊之章昭云竈姓周會暑濕士卒大疫兵不能踰

嶺歲餘高后崩即罷兵佗因此以兵威邊財物賂遺閩越西甌駱役屬焉東西萬餘里迺乘黃屋左纛稱制與中國侔及孝文帝元年初鎮撫天下使告諸侯四夷從代來即位意喻盛德焉乃為佗親冢在真定置守邑歲時奉祀召其從昆弟尊官厚賜寵之

史記尉佗傳

文帝元年召陸賈為中大夫使南越

史記尉佗傳

文帝賜佗書曰皇帝謹問南越王甚苦心勞意朕高皇帝側室之子棄外奉北藩於代道里遼遠壅蔽樸愚未嘗致書高皇帝棄羣臣孝惠皇帝即世高后自臨事不幸有疾日進不衰以故諄暴乎治諸呂為變故亂法不能獨制迺取他姓子為孝惠皇帝嗣賴宗廟之靈功臣之力誅之已畢朕以王侯吏不釋之故不得不立今即位乃者聞王遺

將軍隆慮侯書來親昆弟請罷長沙兩將軍朕以王書罷將軍博陽侯親昆弟在真定者已遣人存問修治先人家前日聞王發兵於邊為寇災不止當其時長沙苦之南郡尤甚雖王之國庸獨利乎必多殺士卒傷良將寡人之妻孤人之子獨人父母得一亡十朕不忍為也朕欲定地犬牙相入者以問吏吏曰高皇帝所以介長沙土也朕不能擅變焉吏曰得王之地不足以為大得王之財不足以為富服領以南王自治之雖然王之號為帝兩帝並立亡一乘之使以通其道是爭也爭而不讓仁者不為也願與王分棄前患終今以來通使如故故使賈馳諭告王朕意王亦受之毋為寇災矣上褚五十衣中褚三十衣下褚二十衣遺王願王聽樂娛憂存問鄰國

漢書南粵王傳

陸賈至南越王甚恐為書謝願長為藩臣奉貢職於是乃下令國中曰吾聞兩雄不俱立兩賢不並世皇帝賢天子也自今以後去帝制黃屋左纛陸賈還報文帝大悅遂至孝景時稱臣使人朝請然南越其居國竊如故號名其使天子稱王朝命如諸侯史記尉佗傳

蠻夷大長老夫臣佗昧死再拜上書皇帝陛下老夫故粵吏也高皇帝幸賜臣佗璽旨為南粵王使為外臣時內貢職孝惠皇帝即位義不忍絕所以賜老夫者甚厚高后自臨用事近細士信讒臣別異蠻夷出令曰毋子蠻夷外粵金鐵田器馬牛羊即予子牡毋子牝老夫處僻馬牛羊齒已長自以祭祀不修有死罪使內史藩中尉高御史平凡三輩上書謝過皆不反又風聞老夫父母墳墓已壞削兄

弟宗族已誅論吏相與議曰今內不得振於漢外亡以自高異故更號為帝自帝其國非敢有害於天下也高皇后聞之大怒削去南粵之籍使使不通老夫竊疑長沙王讒臣故敢發兵以伐其邊且南方卑濕蠻夷中西有西甌其眾半羸南面稱王東有閩粵其眾數千人亦稱王西北有長沙其半蠻夷亦稱王老夫故敢妄竊帝號聊以自娛老夫身定百邑之地東西南北數千萬里帶甲百萬有餘然北面而臣事漢何也不敢背先人之故老夫處粵四十九年於今抱孫焉然夙興夜寐寢不安席食不甘味目不視靡曼之色耳不聽鐘鼓之音者臣不得事漢也今陛下幸哀憐復故號通使漢如故老夫死骨不腐改號不敢為帝矣謹北面因使者獻白璧一雙翠鳥千犀角十紫貝五百

桂蠹一器生翠四十雙孔雀二雙昧死再拜曰聞皇帝陛

下漢書南
粵王傳

武帝建元四年佗孫胡為南粵王漢書南
粵王傳

六年閩越王郢攻南越遣大行王恢將兵出豫章大司農韓

安國出會稽擊之未至越人殺郢降兵還漢書武
帝紀

武帝建元四年佗卒孫胡為南越王時閩越王郢與兵擊

南越胡使人上書曰兩越俱為藩臣毋得擅與兵相攻擊

今閩越與兵侵臣臣不敢與兵唯天子詔之於是天子多

南越王義守職約為興師遣兩將軍往討閩越索隱曰王
恢韓安國

兵未踰嶺閩越王弟餘善殺郢以降於是罷兵天子使莊

助往諭意南越王胡頓首曰天子乃為臣興兵討閩越死

無以報德遣太子嬰齊入宿衛謂助曰國新被寇使者行

矣胡方日夜裝入見天子助去後其大臣諫曰漢興兵誅

郢亦行以驚動南越且先王昔言事天子期無失禮要之

不可以悅好語入見漢書悅作休韋
昭曰誘休好語入見則不得復歸亡

國之勢也於是胡稱病不入見後十有餘歲胡實病甚太

子嬰齊請歸胡薨諡為文王嬰齊代立史記尉
佗傳

大行王恢擊東越因兵威使番陽令唐蒙風曉南粵南粵

食蒙蜀枸醬問所從來曰道西北牂柯江江廣數里出番

禺城下蒙歸至長安問蜀賈人獨蜀出枸醬多持竊出市

夜郎夜郎臨牂柯江江廣百餘步足以行船南粵以財物

役屬夜郎西至桐師然亦不能臣使也漢書西
南夷傳

謹案閩粵興兵事史記東越列傳云建元六年漢書

閩粵傳亦同漢書南粵傳云建元四年佗孫胡為南

粵王立三年閩粵王興兵南擊邊邑云云胡立於建元四年則後三年為建元六年明甚阮通志謂以四年計之事在元光元年并疑漢書與史記牴牾此說恐非蓋佗卒之歲胡即自立為南越王阮通志殆疑其踰年即位故所計略差一年也況漢書本紀明載建元六年閩越王郢擊南越豈得移屬於元光元年哉又考漢書嚴助傳云建元三年閩越舉兵圍東甌後三歲閩越復興兵擊南越然則其事在建元六年於此可證

元狩二年三月南越獻馴象能言鳥漢書武帝紀

元鼎四年封南越王兄越為高昌侯史記建元以來侯者表

五年南越王相呂嘉反攻殺漢使者及其王王太后武帝紀

終軍字子雲濟南人為諫大夫南越與漢和親迺遣軍使南越說其王欲令入朝比內諸侯軍自請願受長纓必羈南越王而致之闕下軍遂往說越王越王聽許請舉國內屬天子大悅賜南越大臣印綬壹用漢法呂新改其俗令使者留鎮撫之越相呂嘉不欲內屬發兵攻殺其王及漢使者皆死漢書終軍傳

秋遣伏波將軍路博德出桂陽下湟水樓船將軍楊僕出豫章下瀕水歸義越侯嚴為戈船將軍出零陵下灘水張晏曰嚴故越人降為歸義侯甲為下瀕將軍下蒼梧服虔曰甲故越人歸漢也皆將罪人江淮呂南樓船十萬人越馳義侯遺應劭曰亦越人也別將巴蜀罪人發夜郎兵下牂牁江咸會番禺武帝紀

閩越王餘善上書請以卒八千從樓船擊呂嘉等兵至揭

陽曰海風波為解不行持兩端陰使南粵漢書閩越王傳

六年十月得呂嘉首遂定粵地以為南海蒼梧鬱林合浦交

阯九真日南珠厓儋耳郡武帝紀

嬰齊在長安時取邯鄲膠氏女生子興及即位請立膠氏女為后興為嗣漢數使使者風諭嬰齊嬰齊尚樂擅殺生自恣懼人見要用漢法比內諸侯固稱疾遂不入見遣子次公入宿衛嬰齊薨諡為明王興代立其母為太后太后未為嬰齊姬時嘗與霸陵人安國少季通元鼎四年漢使安國少季往諭王王太后以入朝比內諸侯令辯士諫大夫終軍等宣其辭勇士魏臣等輔其缺衛尉路博德將兵屯桂陽待使者王年少太后中國人也嘗與安國少季通其使復私焉國人頗知之多不附太后太后恐亂起亦欲

倚漢威數勸王及羣臣求內屬即因使者上書請比內諸侯三歲一朝除邊關天子許之賜其丞相呂嘉銀印及內史中尉太傅印餘得自置除其故黥劓刑用漢法比內諸侯使者皆留鎮撫之王王太后飭治行裝重齎為入朝具其相呂嘉年長矣相三王宗族官仕為長吏者七十餘人男盡尚王女女盡嫁王子兄弟宗室及蒼梧秦王有連索隱曰蒼梧王即下趙光也有連者連姻也趙與秦同姓故稱秦王其居國中甚重越人信之多為耳目者得眾心上書數諫止王弗聽有畔心稱病不見漢使者使者皆注意嘉未能誅王王太后亦恐嘉等先事發乃置酒介漢使者權謀誅嘉等使者皆東鄉太后南向王北向相嘉大臣皆西鄉侍坐飲嘉弟為將將卒居宮外酒行太后謂嘉曰南越內屬國之利也而相君苦不便

者何也以激怒使者使者狐疑相杖遂莫敢發嘉見耳目非是卽起而出太后怒欲縱嘉以矛王止太后嘉遂出分其弟兵就舍乃陰與大臣作亂王素無意誅嘉嘉知之以故數月不發太后有淫行國人不附欲獨誅嘉等力又不能天子聞嘉不聽王王太后弱孤不能制使者怯無決又以爲王王太后已附漢獨呂嘉爲亂不足以興兵欲使莊參以二千人往參曰以好往數人足矣以武往二千人無足以爲也辭不可却壯士故濟北相韓千秋奮曰以區區之越又有王太后應獨相呂嘉爲害願得勇士二百人必斬嘉以報於是天子遣千秋與王太后弟膠樂將二千人往入越境呂嘉等遂反下令國中曰王年少太后中國人也又與使者亂專欲內屬盡持先王寶器入獻天子以自

媚多從人行至長安虜賣以爲僮僕取脫一時之利無顧趙氏社稷爲萬世慮計之意乃與其弟將卒攻殺王太后及漢使者遣人告蒼梧秦王及其諸郡縣立明王長男越妻子術陽侯建德爲王而韓千秋兵入破數小邑其後越直開道給食未至番禺四十里越以兵擊千秋等遂滅之使人函封漢使者節置塞上好爲謾辭謝罪發兵守要害處於是天子下赦曰天子微諸侯力政譏臣不討賊呂嘉建德等反自立晏如令罪人及江淮以南樓船十萬師往討之元鼎六年冬樓船將軍將精卒先陷尋陝破石門得越船粟因推而前挫越鋒以數萬人待伏波伏波將軍將罪人道遠會期後與樓船會乃有千餘人遂俱進樓船居前至番禺建德嘉皆城守樓船自擇便處居東南面伏波

居西北面會暮樓船攻敗越人縱火燒城越素聞伏波名日暮不知其兵多少伏波乃為營遣使者招降者賜印復縱令相招樓船力攻燒敵反驅而入伏波營中犁旦城中皆降伏波呂嘉建德已夜與其屬數百人亡入海伏波又因問所得降者貴人以知呂嘉所之遣人追之以其故校尉司馬蘇宏得建德封為海常侯越郎徐廣曰南越之郎官都稽表孫得嘉封為臨亭侯自尉佗王凡五世九十三歲而亡史記尉佗傳元封元年封涉都侯喜以父棄故南海太守漢兵至以越邑兵誅之滅其國漢書天文志

降子侯二千四十戶漢書功臣表

新莽天鳳元年秋七月置交趾牧郭通志

後漢

光武建武五年十二月交趾牧鄧讓率七郡太守遣使奉貢

後漢書光武紀

謹案岑彭傳云彭與交趾牧鄧讓厚善與讓書陳國家威德於是讓與桂陽太守張隆零陵太守田翕蒼梧太守杜穆交趾太守錫光等相率遣使貢獻考李賢注以南海蒼梧鬱林合浦交趾九真日南為七郡然則南海亦當在七郡之中也

牂柯遣使從番禺江入貢黃通志

番禺縣西有江浦通牂柯郡公孫述時大姓龍傅尹董氏

與郡功曹謝暹保境為漢乃遣使從番禺江奉貢光武嘉之並加褒賞黃通志引南越志

十三年九月南越獻白兔宋書符瑞志

和帝興元元年舊南海獻龍眼荔枝支十里一置五里一候奔騰阻險死者繼路時臨武長汝南唐羌上書陳狀帝下詔曰遠國珍羞本以薦奉宗廟苟有傷害豈愛民之本其勅太官勿復受獻由是遂省焉和帝紀

謝永書曰唐羌字伯游辟公府補臨武長縣接交州舊獻龍眼荔枝及生鮮獻之驛馬晝夜傳送至有遭虎狼毒頓仆死亡不絕道經臨武乃上書曰臣聞上不以滋味為德下不以貢膳為功故天子食太牢為尊不以果實為珍伏見交阯七郡獻生龍眼等鳥驚風發南州土地惡蟲猛獸

不絕於路至於觸犯死亡之害死者不可以復生來者猶

可救也此二物升殿未必延年益壽帝從之和帝紀注

安帝永初三年二月丙辰赦蒼梧鬱林合浦南海吏人為賊所迫者安帝紀

桓帝延熹五年五月長沙零陵賊起攻桂陽蒼梧南海交阯遣御史中丞盛修督州郡討之不克桓帝紀

長沙零陵賊合七八千人自稱將軍入桂陽蒼梧南海交阯交阯刺史侯輔及蒼梧太守甘定望風逃奔賊遂攻沒蒼梧取銅虎符黃通志引通鑑

謹案今本通鑑與此大同小異又無侯輔甘定之名疑黃通志或別有所本也今姑仍之以備參考

六年十一月南海賊寇界桓帝紀

七年秋荊州刺史度尙擊零陵桂陽盜賊大破平之桓帝紀

尙躬率部曲與同勞逸廣募雜種諸蠻夷明設購賞進擊

大破之降者萬餘人桂陽宿賊渠帥卜陽潘鴻等畏尙威

烈徙入山谷尙窮追數百里遂入南海破其三屯多獲珍

寶度尙傳

靈帝光和四年夏交阯刺史朱雋討交阯合浦烏潯蠻破之

靈帝紀

交阯部郡賊並起牧守不能禁又交阯賊梁龍等萬餘人

與南海太守孔芝反光和元年朱雋為交阯刺史斬梁龍

降者數萬人朱雋傳

獻帝建安八年張津為交阯刺史士燮為交阯太守共表立

為州乃拜津為交州牧十五年移居番禺詔以邊州使持節

郡給鼓吹以重威鎮加以九錫六佾之舞晉書地理志

蒼梧士燮為交阯太守交州刺史朱符為夷賊所殺州郡

擾亂燮表其弟壹領合浦太守黼領九真太守武領南海

太守燮雄長一州偏在萬里威尊無上出入儀衛甚盛震

服百蠻朝廷遣南陽張津為交州刺史津好鬼神事常著

絳帕頭鼓琴燒香讀邪道書云可以助化為其將區景所

殺劉表遣零陵賴恭代津為刺史是時蒼梧太守璜死表

又遣吳巨代之朝廷賜燮璽書以燮為綏南中郎將董督

七郡領交阯太守如故巨與恭相失巨兵逐恭恭走還零

陵孫權以番陽太守步騭為交州刺史燮遣兄弟奉承節

度吳巨外附內違騭誘而斬之威聲大震權加燮左將軍

燮遣子入質由是嶺南始服屬於權資治通鑑

謹案張津事見後漢書襄楷傳註陳壽吳書孫策傳
張津為交州刺史士燮為交趾太守二事皆無年月
步騭為交州刺史本傳在建安十五年故資治通鑑
系於十五年之末水經注引王氏交廣春秋曰建安
十六年吳遣臨淮步騭為交州刺史將武吏四百人
之交州道不通蒼梧太守長沙吳巨擁眾五千騭有
疑於巨先使諭巨巨迎之於零陵遂得進州巨既納
騭而後有悔騭以兵少恐不存立巨有都督區景勇
畧與巨同騭惡之陰使人請巨巨往告景勿詣騭騭
請不已景又往乃於廳事前中庭俱斬以首徇眾據
此是區景殺張津之後又為吳巨所用二人皆為步
騭誘殺通鑑本吳書士燮傳畧而不詳王氏之說可

補吳志之缺

建安中吳遣步騭為交州騭到南海登高望遠觀巨海之浩
茫觀原藪之殷阜乃曰斯誠膏腴之地宜為都邑建安二十
二年遷州番禺築立城郭綏和百越遂用甯集水經注
延康元年呂岱代步騭為交州刺史到州高涼賊帥錢博乞
降岱因承制以博為高涼西部都尉是時桂陽滇陽賊王金
合眾於南海界上首亂為害岱討之生縛金傳送詣都斬首
獲生凡萬餘人水經注
南越志吳建安十六年衡殺錢博拒步騭於高要峽毅投
水死博與其屬亡於高涼呂岱為刺史博既請降制以博
為高涼都尉太平御覽

謹案水經注引王氏交廣春秋曰步騭殺吳巨區景

使嚴舟船合兵二萬下取南海蒼梧人衡毅錢博宿
巨部伍興軍逆隲於蒼梧高要峽口兩軍相逢於是
遂交戰毅與眾投水死者千有餘人蓋步隲殺吳巨
區景之後嚴備舟船合兵取南海巨之舊部衡毅錢
博拒之毅戰敗投水死博亡走高涼八年之後至呂
岱為刺史時始降交廣春秋南越志所記詳於吳志
趙一清水經注釋云毅死博逃交廣春秋未得其實
竊謂交廣春秋千有餘人句下必有博亡走高涼之
文善長因其事與高要無涉不復徵引耳且本文亦
不云博與毅俱投水死也

吳

吳大帝黃武五年衛將軍龍編侯交阯太守士燮卒權以交

阯縣遠分合浦以北為廣州呂岱為刺史交阯以南為交州

戴良為刺史又遣陳時為交阯太守燮子徽自置交阯太守

發兵拒良呂岱被詔誅徽士燮傳

分交州置廣州俄復舊吳志孫權傳

嘉禾五年二月呂岱討南海賊羅厲斬之吳志孫權傳

赤烏五年鍾離牧從郎中補太子輔義都尉遷南海太守鍾離

十一年以陸允為交州刺史陸允傳

景帝永安七年復分交州置廣州孫休傳

歸命侯孫皓三年夏郭馬反孫皓傳

馬本合浦太守脩允部曲督允轉桂陽太守病住廣州先

遣將五百兵至郡安撫諸夷允死兵當外給馬等累世舊

軍不樂離別皓時又科實廣州戶口馬與部曲將何典王

族吳述殷興等因此恐動兵民攻殺廣州督虞授馬自號

都督交廣二州諸軍事安南將軍興廣州刺史述南海太

守典攻蒼梧族攻始興

孫皓傳

漢晉春秋曰先是吳有讖曰吳之敗兵起南裔亡吳者公

孫也皓聞之文武職位至於卒伍有姓公孫者皆徙廣州

及郭馬反大懼曰此天亡也

孫皓傳注

八月以滕循為司空未拜轉鎮南將軍假節領廣州牧率萬

人從東討馬典族遇於始興未得前馬殺南海太守劉畧逐

廣州刺史徐旗皓又遣徐陵陶濬將七千人從西道命交州

牧陶璜部伍所領及合浦鬱林諸部兵與東西共擊馬

孫皓傳

滕脩吳書作循討郭馬未克聞晉伐吳帥眾赴難至巴邱聞吳

亡縞素流涕還與廣州刺史閻豐蒼梧太守王毅各送印

綬請降皓遣陶璜之子融持手書請璜璜流涕數日亦送

印綬降皆復其官職

資治通鑑

晉

武帝太康九年夏四月南海地震

黃通志

懷帝永嘉六年王澄將王機據廣州

黃通志

孝愍帝建興三年秋八月廣州刺史陶侃討王機平之

黃通志

王機字令明長沙人父毅廣州刺史甚得南越之情慕王

澄為人澄亦以為己亞用為成都內史澄遇害機懼禍及

又屬杜弢所在發墓而獨為機守冢機益自疑就敦求廣

州敦不許會廣州人背刺史郭訥迎機為刺史機將奴客

門生千餘人入廣州州部將温邵迎機敦遣將軍葛幽追

之機叱曰何以敢來送死耶幽不敢逼而歸郭訥聞邵納機遣兵擊邵反為所敗訥又遣父兄時吏拒之咸倒戈迎機訥乃握節而避機遂入城求節訥嘆曰昔蘇武不失其節前史以為美談此節天朝所假義不相與自可遣兵來取之機慙而止機自以纂州懼為王敦所討時杜弼餘黨杜宏奔臨賀送金數千兩與機求討桂林賊以自效機為列上王敦以機難制又欲因機討梁碩轉機為交州刺史碩聞遣子候機機怒其迎遲云至州當相收拷碩子馳報碩曰王郎已壞廣州何可復來破交州也乃不迎之府司馬杜讚討碩為碩所敗碩恐諸僑人為機悉殺其良者機為碩所拒遂住鬱林時杜宏破桂林賊還機勸宏取交州宏乃執機節曰當相與送持何可獨捉機遂以節與之

於是機與温邵劉沉等並反陶侃為廣州刺史到始興先討温劉殺之機遣牙門屈藍還州詐云增糧密招誘所部以拒侃侃收藍斬之遣督護許高討機機走病死於道高掘其尸斬首并殺其二子焉王機傳

陶侃至始興州人皆言宜觀察形勢不可輕進侃不聽直至廣州諸郡縣皆已迎機矣杜宏遣使偽降侃知其謀進擊宏破之遂執劉沉於小桂遣督護許高討王機走之機病死於道高掘其尸斬之諸將皆請乘勝擊温邵侃笑曰吾威名已著何事遣兵但一函紙自定耳乃下書諭之邵懼而走追獲於始興杜宏詣王敦降廣州平通鑑

謹案王機郭訥及侃平廣州事史書無年月王郭事通鑑系於永嘉之末陶侃事系於建興三年黃通志

亦依通鑑今從之

愍帝建興三年江揚二州經石冰陳敏之亂民多流入廣州

詔加存恤黃通志引交廣記

元帝太興元年加廣州刺史陶侃平南將軍元帝紀

永昌元年正月王敦作亂宜都太守譚該等帥所統致討遣

羅英至廣州約陶侃同進侃即遣參軍高寶帥師北下通鑑

明帝太甯三年以陶侃為征西大將軍都督荆湘雍梁四州

諸軍事荆州刺史王舒為安南將軍都督廣州諸軍事廣州

刺史六月以廣州刺史王舒為都督湘州諸軍事湘州刺史

劉顛為平越中郎將督廣州諸軍事廣州刺史明帝紀

成帝咸和三年九月前交州刺史張璉據始興反進攻廣州

鎮南司馬會勰等擊破之成帝紀

四年以陶侃都督交廣甯州諸軍事通鑑

五年詔以鄧嶽督交廣諸軍事領廣州刺史通鑑

孝武帝太元三年詔禁廣州夷人錢貨文獻通考

詔曰錢國之重實小人貪利銷壞無已監司當以為急廣

州夷人貨重銅鼓而州境素不出銅聞官私買人皆以錢

入廣州貨與夷人鑄敗作鼓其重為禁制得者科罪晉書

十六年十二月白雀見南海增城縣民吳比屋宋書符瑞志

謹案黃通志載此在太元十六年阮通志載此在太

康十六年并云太康無十六年疑宋志之誤考宋書

符瑞志所載次於晉愍帝當作元帝建武元年之後則為

孝武帝時事無疑特太元誤作太康耳冊府元龜引

此亦在太元十六年今從黃通志

十七年甘露降南海番禺縣楊樹

宋書符瑞志

安帝元興元年春二月以右將軍吳隱之為廣州刺史

黃通志

二年加刺史吳隱之前將軍詔賜錢穀

黃通志

詔曰夫家行篤於閨門清節勵乎風霜實立人之所難而

君子之美致也龍驤將軍廣州刺史吳隱之孝友過人祿

均九族菲已潔素儉愈魚飡夫處可欲之地而能不改其

操饗惟錯之富而家人不易其服革奢務膏南域改觀朕

有嘉焉可進號前將軍賜錢五十萬穀千斛

晉書

三年盧循寇廣州刺史吳隱之為循所敗執始興相阮腆之

而還

安帝紀

盧循攻廣州吳隱之閉城固守十月壬戌夜火起時百姓

避寇滿城隱之懼有應賊者但務嚴兵不先救火由是府

舍焚盪燒死者萬餘人因遂散潰悉為賊擒

五行志

盧循攻番禺執吳隱之自稱平南將軍攝廣州事聚燒骨

為冢葬於洲上得髑髏三萬餘枚又使徐道覆攻始興

相阮腆之

通鑑

義熙元年四月盧循遣使貢獻時朝廷新定未暇征討以循

為廣州刺史徐道覆為始興相

通鑑

循遣劉裕益智綜裕報以續命湯循以前琅邪內史王誕

為平南長史說循曰誕本非戎旅在此無用素為劉鎮軍

所厚若得北歸必蒙寄任公私際會仰荅厚恩循甚然之

劉裕與循書令遣吳隱之還循不從又說循曰將軍今留

吳公公私非計孫伯符豈不欲留華子魚耶但以一境不

容二君耳於是遣隱之與誕俱還

通鑑

謹案阮通志云桓元流王誕於廣州是時與吳隱之並陷於循循為廣州刺史宋書武帝紀在義熙二年通鑑與宋書異

六年二月廣州刺史盧循反安帝紀

十二月劉裕板建威將軍褚裕之行廣州刺史通鑑

七年二月盧循至番禺為孫季高所破將餘眾南走劉藩孟懷玉斬徐道覆於始興交州刺史杜慧度斬盧循傳首京師

宋書武帝紀

高祖遣季高率眾三千汎海襲番禺初賊不以海道為防季高至東衝去城十餘里城內猶未知守戰士猶有數千人城池甚固季高先焚舟艦悉力登岸會天大霧四面陵城即日克拔循父嘏長史孫建之司馬虞廷夫等輕舟奔

始興即分遣振武將軍沈田子等討平嶺表諸郡循於左里奔走而眾力猶盛還襲廣州季高拒戰二十餘日循乃破走至鬱林會病不得窮討循得走向交州義熙七年四月季高卒於晉康宋書孫處傳

盧循字于先小名元龍司空從事中郎諶之曾孫也雙眸炯徹瞳子四轉善草隸奕棋之藝娶孫恩妹及恩作亂恩性酷忍循每諫止之人士多賴以免恩亡餘眾推循為主元興二年攻永嘉劉裕討循至晉安循窮急泛海到番禺逐刺史吳隱之自攝州事遣使貢獻時朝廷新誅桓氏中外多虞乃權假循征虜將軍廣州刺史平越中郎將義熙中劉裕伐慕容超循所署始興太守徐道覆循之姊丈也使人勸循乘虛而出不從乃至番禺說循曰朝廷以君為

腹心之疾不乘此機而保一日之安若平齊之後劉公自率衆至雖復君之神武不能當也今日之機萬不可失既克都邑裕雖還無能爲也君若不同便當率始興之衆直指尋陽循甚不樂此舉無以奪其計乃從之初道覆密欲裝衆艦使人伐材於南康僞云將下都貨之後稱力少不能得致賤賣之居人貪賤賣衣物而市頓石水急出船甚難皆儲之故船板大積而百姓弗之疑及道覆起兵按賣券取之無隱匿者乃并力裝之旬日而辦遂舉衆寇南康諸郡守相皆委任奔走鎮南將軍何無忌率衆拒之兵敗被害循遣道覆寇江陵爲官軍所敗馳走告循曰請并攻京都若克之江陵非所憂也乃連旗而下敗劉毅於桑落洲逕至江陵道覆素有膽決知劉裕已還欲乾沒一戰請

於新亭至白石焚舟而上數道攻之循多謀少決固不聽道覆嘆曰我終爲盧公所悞事必無成使我得爲英雄驅馳天下不足定也裕懼其侵軼乃柵石頭以拒之循攻柵不利乃攻京口掠諸縣無所得謂道覆曰師老矣可據尋陽取荊州徐更與都下爭衡猶可以濟因自蔡州南走據尋陽裕遣羣率追討自統大衆繼進敗循於雷池循還豫章柵斷左里裕攻柵循衆不能抗單舸走保廣州裕先遣孫處從海道據番禺循攻之不下道覆保始興自固循乃襲合浦克之攻交州至龍編刺史杜慧度諳而敗之循知不免先鳩妻子召妓妾問曰我將自殺誰能同者多云雀鼠貪生就死實人情所難有云官尙當死某豈願生於是悉鳩諸辭死者自投於水慧度取其尸斬之及其父嘏傳

首京師盧循傳

安帝義熙初童謡曰官家養蘆化成荻蘆生不止自成積其時官養蘆龍寵以金紫奉以名州養之極也而龍不能懷我好音舉兵內伐遂成讐敵也蘆生不止自成積及盧龍之敗斬伐其黨猶如草木以成積也晉書五行志

盧龍據廣州人為之謡曰蘆生湯湯竟天半後擁上流數州之地內逼京輦應天半之言晉書五行志

十三年秋七月南海賊徐道期陷廣州始興相劉謙之討平之以謙之為振威將軍廣州刺史黃通志

劉謙之義熙末為始興相東海人徐道期流寓廣州無士行為僑舊所凌侮因刺史謝欣死率不逞之徒作亂攻沒州城殺士庶素憾者百餘傾府庫招集亡命出攻始興謙

之破走之進平廣州仍行州事即以為振威將軍廣州刺

史宋書劉康祖傳

宋

宋武帝永初三年罷廣州獻細布黃通志

廣州嘗獻入筒細布一端八丈上惡其精麗勞人即付有

司彈太守以布還之並詔嶺南禁作此布南史

文帝元嘉二年八月以右軍長史江桓為廣州刺史宋書文帝紀

三年夏五月宋遣散騎常侍李耽之使廣州黃通志

四年十一月甘露降南海熙安廣州刺史江桓以聞符瑞志

五年四月以始興太守徐豁為廣州刺史文帝紀

六年七月以尚書左丞孔默之為廣州刺史文帝紀

八年五月甘露降南海番禺符瑞志

九年六月詔曰益梁交廣境域幽遐治宜物情或多偏攤可更遣大使巡求民瘼置積射強弩將軍官十一月於廣州立

宋唐郡文帝紀

十年謝靈運有罪伏誅通鑑綱目

謝靈運高祖受命出為永嘉太守太祖登祚再召不起使

范泰與靈運書乃出就職多稱疾不朝上不欲傷大臣意

令自解乃陳疾東歸太守孟顛表其異志靈運詣上表詔

降死一等徙付廣州其後秦郡府將宗齊受至除口行達

桃墟村見七人下路亂語疑非常人還告郡縣遣兵隨齊

受掩討遂共路戰悉擒付獄其一人趙欽云謝康樂給錢

令買弓箭刀楯等物有司奏依法收治詔於廣州棄市謝靈運傳

傳

謹案謝靈運事通鑑系於元嘉十年之末

十五年八月以始興內史陸徽為廣州刺史文帝紀

十六年三月己卯甘露降廣州城北楊樹刺史陸徽以聞宋書

符瑞志

十七年以彭城王義康將成禍亂徙其黨何默子等五人於

廣州通鑑

二十年八月以廷尉陶愨祖為廣州刺史文帝紀

二十二年宋徙逆黨謝緯等於廣州黃通志

孔熙先父默之為廣州刺史以贓貨得罪彭城王義康保

持之故得免及義康被黜熙先密懷報效與范蔚宗謀逆廣

州人周靈甫有家兵部曲熙先以六十萬錢與之使於廣

州合兵靈甫一去不反范蔚宗傳

孔熙先范曇謀反緯兄綜許發大將軍府兵事發俱伏誅
睦兄弟子父已亡者及緯俱徙廣州宋書

二十七年宋徵廣州刺史劉道產下獄尋宥之黃通志

二十一年劉道錫以巴西梓潼二郡太守遷揚烈將軍廣

州刺史二十七年坐貪縱自杖治中荀齊文垂死乘輿出

城行與阿尼同載為有司所糾明年散徵又以赦後餘贓

收下廷尉被宥病卒劉道產傳

二十九年七月以右將軍宗慤為廣州刺史宋書武帝紀

九月南海太守蕭簡據廣州反武帝紀

蕭簡歷位長沙內史廣陵王誕為廣州未之鎮以簡為安

南諮議參軍南海太守行州事世祖入討元兇遣輔國將

軍南海太守劉玩劉玩誤當作鄧琬討簡城陷伏誅諸子並誅滅

蕭思話傳

沈法系世祖以為甯朔將軍始興太守討蕭簡簡誑其眾

曰臺軍是賊劭所遣並信之前征北參軍顧邁被賊徒在

城內善天文云荆江有大兵城內由此固守初世祖遣鄧

琬圍簡惟治一攻道法系至曰宜四面並攻若守一道何

時可拔琬慮功不在已不從法系曰更相申五十日日盡

又不克乃從之八道俱攻一日即拔封庫藏付鄧琬而還

沈慶之傳

孝武帝孝建三年二月以御史中丞王冀為廣州刺史武帝紀

八月以尚書吏部王琨為廣州刺史武帝紀

大明二年八月以交州刺史費淹為廣州刺史武帝紀

三年費淹獻三角水牛五行志

五年前朱提太守費沈殺陳檀尋伏誅黃通志

廣州諸山俚獠種類繁熾前後屢為侵暴世祖大明中合浦大帥陳檀歸順拜龍驤將軍四年檀表乞官軍征討未附以檀為高興太守將軍如故遣前朱提太守費沈龍驤將軍武期率眾南伐并通朱嵯道無功殺檀而反沈下獄

死南夷林邑國傳

五年十月以冠軍將軍臨海王子頊為廣州刺史武帝紀

六年七月以輔國將軍王翼之為廣州刺史武帝紀

七年五月輔國將軍始安王子真為廣州刺史武帝紀

明帝泰始二年正月晉安王子勛僭即偽位於尋陽廣州刺

史袁曇當從宋書作曇遠同逆李延壽南史明帝紀

齊王世子為南康頓令鄧琬遣使收世子世子腹心蕭欣

祖桓康等奉世子奔竄草澤召募得百餘人攻郡出世子世子自號甯朔將軍與南康相沈用之前南海太守何曇直晉康太守劉紹祖北地傅浩東莞童禽等據郡起義琬徵始興相殷孚為御史中丞并令率郡人俱下孚眾盛世子避之於揭陽山殷孚既去始興以郡五官掾譚伯初留知郡事士人劉嗣祖等斬伯初據郡起義琬遣始興太守韋希真鷹揚將軍楊宏之領眾一千討嗣祖嗣祖亦遣眾出南康與世子合希真等以義徒疆盛住廬陵不敢進廣州刺史袁曇遠聞始興起義遣將李萬周陳伯紹率眾討嗣祖嗣祖遣兵戍浚陽萬周亦築壘相守嗣祖遣人誑萬周曰尋陽已平臺遣劉勔為廣州垂至萬周信之還襲番禺夜以長梯入城曇遠怯弱無防聞萬周反更徒跣出奔

萬周追斬之於城內交州刺史檀翼被代還至廣州貨
鉅萬萬周誣以為逆襲而殺之遂劫掠公私銀帛籍畧袁

檀珍寶悉以自入鄧琬傳

謹案是時廢帝任凶何邁謀迎立王子勛事世賜子
勛死長史鄧琬等矯太后詔奉子勛為帝世子者蕭
道成子蹟也

二年十月以輔國將軍劉劬為廣州刺史十二月以新除廣
州刺史劉劬為益州刺史前巴西梓潼二郡太守費混為廣

州刺史明帝紀

三年二月以御史中丞羊南為廣州刺史明帝紀

四年三月妖賊攻廣州殺刺史羊南當作希龍驤將軍陳伯紹

討平之明帝紀

泰始三年羊希出為甯朔將軍廣州刺史希初請女夫鎮
北中兵參軍蕭惠徽為長史帶南海太守太宗不許又請
東莞太守希既到鎮長史南海太守陸法真喪官希又請
惠徽補任詔曰希卑門寒士累世無聞輕薄多豐備彰歷
職徒以清刻一介擢授嶺南干上逞欲求訴不已可降號
橫野將軍初李萬周劉嗣祖籍畧廣州太宗以萬周為步
校尉加甯朔將軍權行廣州事希至萬周等並有異圖希
誅之希以沛郡劉思道行晉康太守領軍伐俚違節度失
利希遣收之思道不受命率所領攻州城司馬鄒嗣之拒之西
炎於朝亭拒戰軍敗見殺進攻州城司馬鄒嗣之拒之西
門戰死希踰城走思道獲而斬之府參軍鄒曼率數十人
襲思道已得入城力不敵又敗東莞太守蕭惠徽率郡文

武千餘人攻思道又見殺時龍驤將軍陳伯紹伐俚還擊思道定之贈希輔國將軍惠徽中書郎嗣之越騎校尉希子崇聞廣州亂即日徒跣出新亭不能步涉頓伏江渚門義以小船致之於是進路父葬畢不勝哀卒羊元侃傳

謹案羊南為廣州刺史本紀在泰始三年羊希為刺史本傳亦在三年阮通志云希傳三年當是二年之誤蓋希死後羊南乃鎮廣州也以今考之殆不盡然考明帝紀但有羊南無羊希然明帝紀言妖賊殺羊南龍驤將軍陳伯紹討平之羊希傳言劉思道殺希羊希必同是一人故通鑑系羊希事於泰始四年三月南史亦謂羊希為妖賊所殺也但不審明帝紀何

以作羊南與羊希傳互異耳

四月以豫章太守張辯為廣州刺史五月曲赦廣州明帝紀

五年十二月以建安王世子融為廣州刺史明帝紀

七年五月以甯朔長史孫超之為廣州刺史明帝紀

秦豫元年六月白雀見廣州刺史孫超之以獻符瑞志

廢帝元徽元年三月以撫軍長史何恢為廣州刺史後廢帝紀

三年以游擊將軍陳顯達為廣州刺史後廢帝紀

順帝昇明元年十一月以交州刺史沈景德為廣州刺史順帝紀

十二月荊州刺史沈攸之反以驍騎將軍周盤龍為廣州刺

史廣州刺史陳顯達舉義兵順帝紀

到撫弟遁元徽中為甯遠將軍輔國長史南海太守在廣

州昇明元年沈攸之反刺史陳顯達起兵以應朝廷遁以
猶豫見殺南齊書到揭傳

齊

高祖建元三年四月以甯朔將軍沈景德為廣州刺史南齊書高

紀祖

武帝永明二年三月以少府趙翼為廣州刺史武帝紀

四年秋八月以鎮南長史蕭惠休為廣州刺史武帝紀

惠休為廣州刺史罷任獻奉傾資上勅舍人茹法亮曰可
問蕭惠休吾先使卿宣制答其勿以私祿足充獻奉今段
殊覺其下情厚於前後人問之故當不侵私邪吾欲分受
之也蕭惠休基傳

九年三月以太子左衛率劉纘為廣州刺史武帝紀

鬱林王隆昌元年六月以黃門侍郎王思遠為廣州刺史鬱林

紀王

海陵王延興元年八月以輔國將軍王詡為廣州刺史海陵王紀

王晏弟詡永明中為少府卿六年勅位未登黃門郎不得

蓄女伎坐蓄伎免官復出為輔國將軍始興內史廣州刺

史劉纘為奴所殺詡率郡兵討平之延興元年授詡持節

廣州刺史晏誅上遣南中郎司馬蕭季做襲殺之王晏傳

明帝建武四年二月以征虜將軍蕭季做為廣州刺史明帝紀

東昏侯永元元年六月以始興內史范雲為廣州刺史十月

以始興內史顏翻為廣州刺史東昏侯紀

周世雄永元中為江西督護陳顯達起事世雄殺廣州刺

史蕭季做稱季做同逆送首京師廣州刺史顏翻討殺之

周盤
龍傳

三年二月以威烈將軍胡元進為廣州刺史三月以驃騎將

軍沈徽為廣州刺史

東昏
侯紀

十二月以冠軍將軍鄧元起為廣州刺史

和帝
紀

謹案阮通志云元起為廣州刺史以李延壽南史年

月考之當在和帝改元中興元年三月蕭書本紀殘

缺失次

梁

武帝天監二年樂藹為持節督廣交越三州事冠軍將軍平

越中郎將廣州刺史前刺史徐元瑜罷歸道遇始與人士反

逐內史崔陸舒因掠元瑜財產元瑜走歸廣州借兵託欲討

賊實謀襲藹藹覺之誅元瑜等尋進號征虜將軍卒於官

梁書

樂藹
傳

六年九月以豫章內史蕭昌為廣州刺史

武帝
紀

蕭昌遷持節都督廣交桂越四州諸軍事輔國將軍平越

中郎將廣州刺史七年進號征遠將軍

蕭景
傳

八年左民尚書柳惲除持節都督廣交桂越四州諸軍事仁

武將軍平越中郎將廣州刺史

柳惲
傳

十三年衡陽嗣王元簡以給事黃門侍郎出為持節督廣交

越三州諸軍事平越中郎將廣州刺史

元簡
傳

十六年梁廣州流人王貞秀參軍杜景謀襲州城長史蕭昂

討斬之

黃通
志

王貞秀以居喪無禮為有司奏徙越州後有詔留廣州乃

潛結仁威府中參軍杜景謀襲州城長史蕭昂討平之

王茂

傳

以輕車將軍蕭昂為廣州刺史黃通志

蕭昂天監初累遷司徒右長史以輕車將軍出為廣州刺

史普通二年為散騎常侍蕭景傳

謹案王貞秀事無年月可考黃通志載此事於天監

十六年不知何所本考蕭昂以天監初為廣州刺史

則此必天監時也然竊疑昂必先為長史後為刺史

阮通志載昂為刺史在前而附王貞秀事於後時代

未免倒混今更正

普通六年二月以魏征虜將軍元景仲當作隆為廣州刺史武帝

紀

大通元年假蘭欽節都督衡州三郡兵討桂陽陽山始興叛

蠻破之授持節都督衡桂二州諸軍衡州刺史赴職經廣州

因破俚帥陳文徹兄弟並擒之蘭欽傳

蘭欽征夷獠擒送陳文徹所獲不可勝計獻大銅鼓累代

所無陳書歐陽頌傳

謹案阮通志云江左廣州刺史未有稱安南將軍者

當從南史作平南將軍為是

中大通三年二月乙丑以廣州刺史元景隆為安右將軍梁書

武帝紀

以元景仲出為持節都督廣越等十二州諸軍事宣惠將軍

平越中郎將廣州刺史元法僧傳

謹案元景仲傳作大通三年然大通實無三年也今

移置於此

十月前樂山縣侯蕭正則有罪流徙至是招誘亡命欲寇廣州在所討平之武帝紀

臨川王子正則坐匿盜徙鬱林與江西督護靳山顧通寶招誘亡命將襲番禺刺史元景仲命長史元孝深討之正則敗逃於厠村人縛送之詔斬於南海南史正則傳

蕭勵為廣州刺史江西俚帥陳文徹出寇高要未幾降附勵以江南危險宜立重鎮乃表臺於高涼立州勅仍以高州以江西督護孫罔為刺史南史蕭勵傳

謹案阮通志云勵為刺史無年月以其時考之當在元景仲之後蕭映之前

大同八年盧子略等反攻廣州參軍陳霸先討平之以霸先為西江督護高要太守黃通志

新喻侯蕭映為吳興太守甚重高祖及映為廣州刺史高祖為中直兵參軍隨府之鎮令高祖招集士馬眾至千人監宋隆郡尋監西江都護高要郡守李賁反臺遣高州刺史孫罔新州刺史盧子雄擊之不時進皆於廣州伏誅子雄弟子畧與罔子姪及其主帥杜天合杜僧明共舉兵執南江督護沈顛進寇廣州高祖率精兵三千卷甲兼行以救之頻戰屢捷天合中流矢死眾潰僧明遂降梁武帝深嘆異焉遣畫工圖高祖容貌觀之陳書高祖紀

胡穎字方秀吳興人武帝在廣州穎深自結託從克元景仲平蔡路養李遷仕皆有功南史胡穎傳

徐度字孝節安陸人從梁始興內史蕭介征山洞以驍勇聞陳武帝在交阯乃委質焉武帝克廣州平蔡路養破李

遷任計畫多出於度南史徐道傳

謹案阮通志云此事陳書在九年南史在十年通鑑在八年當以陳書本紀為正然考陳書祇云大同初未嘗實指為大同九年也通鑑系此事於大同八年黃通志亦然今從之

冬蕭映卒明年高祖送喪還都至大庾嶺有詔為廣州司馬武平太守與刺史楊暕南討高祖眾軍發自番禺高祖軍至交州李賁眾潰傳首京師陳書武帝紀

謹案阮通志載此事云十六年蕭映卒考梁大同無十六年阮志誤也考陳書武帝紀實作其年冬蕭映卒則非十六年也審矣今改正

梁刺史蘭欽為前刺史蕭恬所殺黃通志

蘭欽為廣州刺史前刺史新喻侯蕭映薨南安侯恬權行軍事冀得即真聞欽至嶺厚貨厨人塗刀以毒削瓜欽及愛妾俱死蘭欽傳

謹案蘭欽破陳文徹後為蕭恬所殺本傳俱不言年月黃通志以破陳文徹事系於大同元年為蕭恬所殺事系於大同二年固屬臆斷阮通志則總系於大通元年尤為舛誤考是時蕭映尙未為廣州刺史欽何由至廣州為蕭映之弟南平侯恬所殺哉今以其事系於蕭映既卒之後庶不與本傳參錯云

太清元年復以元景隆為廣州刺史未至卒以其弟景仲代之黃通志

三年七月廣州刺史元景仲謀應侯景陳霸先起兵攻之景

仲自殺霸先迎定州刺史蕭勃為刺史

梁書武帝紀

元景仲大同中徵侍中左衛將軍代兄景隆後為廣州刺史侯景作亂以景仲元氏之族遣信誘之許奉為主景仲乃舉兵將下應景會西江督護陳霸先與成州刺史王懷明等起兵攻之霸先徇其眾曰朝廷以元景仲與賊連從謀危社稷今使曲江公勃為刺史鎮撫此州眾聞之皆棄甲而散景仲乃自縊而死

梁書元法僧傳

謹案元景隆景仲俱北魏宗室元法僧之子景隆封沌陽縣公景仲封枝江縣公普通中為廣州刺史太清初又為廣州刺史行至雷首遇疾卒者景隆也大通三年任廣州刺史大同中徵侍中左衛將軍太清初代兄景隆後為廣州刺史者景仲也梁書武帝紀

普通六年二月以魏征虜將軍元景仲為廣州刺史仲字當是隆字之誤耳乃阮通志疑景仲於普通中為刺史至太清初復任是未細讀梁書列傳也今更正

簡文帝大寶元年十二月以定州刺史蕭勃為鎮南將軍廣

州刺史

梁書元帝紀

謹案大寶元年元帝在江陵猶稱太清四年

元帝承聖元年六月衡州刺史王懷明作亂廣州刺史蕭勃討平之

通鑑

謹案元帝於是年十一月改元承聖

二年四月廣州刺史曲江侯勃自以非上所授內不自安上亦疑之勃啟求人朝五月乙巳上以王琳為廣州刺史勃為

晉州刺史九月曲江侯勃遷居始興王琳使副將孫瑒先行

據番禺元帝紀

十一月徵廣州刺史王琳入朝元帝紀

敬帝紹泰元年孫瑒聞江陵陷棄廣州還曲江侯勃復據有

之通鑑

十月進蕭勃為太尉敬帝紀

太平元年十二月進太尉鎮南將軍蕭勃為太保驃騎將軍

敬帝紀

二年二月太保廣州刺史蕭勃舉兵反遣偽帥歐陽頎傅泰

勃從子孜為前軍南江州刺史余孝頃以兵會之詔平西將

軍周文玉平南將軍侯安都率軍南討周文育於巴山生擒

歐陽頎文育前軍丁法洪於蹠口生俘傅泰蕭牧余孝頃退

走德州刺史陳法武前衡州刺史陳世遠於始興攻殺蕭勃

四月曲赦江廣衡三州并督內為賊所拘逼者並皆不問蕭

勃故主帥前直閣蕭鼓襲殺世遠仍為亡命夏侯明徹所殺

勃故記室李寶藏奉懷安侯蕭任據廣州作亂敬帝紀

世祖以王琳代勃勃遣其將孫盪監廣州盡帥所部屯始

興頎別據一城不往謁勃怒遣兵襲收其貨財馬仗尋赦

之與之結盟頎遂事勃勃起兵廣州遣頎及其將傅泰等

為前軍譚世遠攻殺勃勃主帥蕭鼓殺世遠軍主夏侯明

徹殺鼓持勃首降通鑑

謹案陳書高祖紀梁大清三年十二月蔡路養起兵

據南康勃遣腹心譚世遠為曲江令與路養同壓義

軍是譚世遠固勃腹心與殺勃之陳世遠迴殊通鑑

以陳為譚誤甚

四月懷安侯任據廣州丞相陳霸先以歐陽頎為衡州刺史討嶺南未至其子紇已克始興頎至嶺南州郡皆降敬帝紀

陳

高祖永定三年正月以鎮南將軍廣州刺史歐陽頎即本號開府儀同三司頎表稱白龍見於州江南岸長數十丈大可八九圍歷州城西道入天井陳書高祖紀

永定三年世祖即位以鎮南將軍開府儀同三司廣州刺史歐陽頎進號征南將軍世祖本紀

文帝天嘉四年二月征南將軍開府儀同三司廣州刺史歐陽頎進號征南大將軍九月歐陽頎薨文帝紀

宣帝大建元年正月護軍將軍沈恪為鎮南將軍廣州刺史

宣帝紀

十月新除左衛將軍歐陽紇據廣州反宣帝紀

宣帝紀二年二月儀同章昭達擒歐陽紇送都斬於建康市廣州平

歐陽頎子紇字奉聖頗有幹畧天嘉中除黃門侍郎員外散騎常侍累遷安遠將軍衡州刺史襲封陽山郡公都督交廣等十九州諸軍事廣州刺史在州十餘年威望著於百越進號輕車將軍光大中上流藩鎮並多懷貳高宗以紇久在南服頗疑之大建元年下詔徵紇為左將軍紇懼遂舉兵攻衡州刺史錢道戢告變乃遣儀同章昭達討紇紇兵敗伏誅家口籍沒子詢以年幼免歐陽頎傳歐陽紇反詔章昭達討之倍道兼行達於始興紇聞昭達

奄至恒擾不知所為乃出頓涯口多聚沙石盛以竹籠置於水柵之外用遏舟艦昭達居其上流裝艦造船以臨賊柵令軍人銜刀潛行水中以砍竹籠三蔑皆解因縱大艦隨流突之賊眾大敗擒紇送於京師章昭達傳徐儉一名眾初廣州刺史歐陽紇舉兵反高宗令儉持節喻旨紇初見儉盛列仗衛言詞不恭儉曰呂嘉之事誠當已遠將軍獨不見周迪陳寶應乎轉禍為福未晚也紇默然不答懼儉沮其眾不許入城置儉於孤園寺遣人守衛累旬不得還紇嘗出見儉儉謂之曰將軍業已舉事儉須還報天子儉之性命雖在將軍將軍成敗不在於儉幸不見留於是乃遣儉從間道馳還高宗乃命章昭達率眾討紇仍以儉悉其形勢勅儉監昭達軍紇平高宗嘉之賜奴

婢十人米五百斛徐陵傳

高宗即位周確為東宮通事舍人母憂去職及歐陽紇平

起為中書舍人命於廣州慰勞陳書周確傳

六月廣州刺史沈恪進號鎮南將軍宣帝紀

四年十月以鎮南將軍廣州刺史沈恪為領軍將軍宣帝紀

南康王子方泰天嘉元年為丹陽尹大建四年遷使持節都

督廣衡交越成定明新合羅德宜黃利安建石碓十九州諸

軍事平越中郎將廣州刺史為政殘暴為有司所奏免官南康

愍王曇朗傳

謹案沈恪徵為領軍即以方泰為刺史所督之十九

州傳備列之祇十八州其一州不知為何州也

七年十二月以長沙王叔堅為平越中郎將廣州刺史宣帝紀

大建八年以沈君高為廣州刺史黃通志

十二年廣州刺史馬靖得嶺表人心兵馬精練數有戰功朝廷疑之遣吏部侍郎蕭引觀靖舉措諷令送質外托收督賅物引至番禺即遣子弟入質通鑑

後主至德二年陳方慶為武州刺史初廣州刺史馬靖大得人心士馬彊盛朝廷疑之至是以方慶為仁威將軍廣州刺史以兵襲靖靖誅進號宣毅將軍方慶性清謹甚得民和進

號雲麾將軍南康愍王曇朗傳

貞明三年隋師濟江衡州刺史王勇南史作王猛遣高州刺史戴

智烈將五百騎迎方慶欲令承制督諸軍事是時隋行軍總管韋洸帥師度嶺宣敕云若嶺南平定留勇與豐州刺史鄭萬頃且依舊職方慶聞之恐勇賣已率兵拒智烈智烈斬方

慶於廣州虜其妻子南康愍王曇朗傳

謹案陳時廣東無豐州當是隋書地理志失載此州也

王勇大建中為晉陵太守方慶之襲馬靖也以勇為昭武將軍東衡州刺史領始興內史為方慶聲勢靖誅以功封龍陽子及隋軍臨江晉光勝將軍總督衡廣交桂武等二十四州軍事平越中郎將仍入援會京城陷因移檄管内徵兵據守使鄧暲將兵五千頓嶺上遣使迎方慶欲假以為名自執兵要方慶敗又令其將王仲宣曾孝武迎西衡州刺史衡陽王伯信伯信懼奔於清遠郡孝武追殺之時韋洸兵已上嶺高粱洸氏舉兵應隋攻陷旁郡勇計無所出乃以眾降行至荊州病卒南康愍王曇朗傳

隋

文帝開皇十年八月遣柱國襄陽郡公韋洸上開府東萊郡公王景並持節巡嶺南百越皆服高祖紀

嶺南數郡奉洸氏為主保境拒守詔韋洸等安撫陳豫章太守徐璿據南康洸等不得進晉王廣遣陳叔寶遣夫人書使之歸隋夫人遣其孫馮魂迎洸洸擊斬徐璿入廣州通鑑

謹案洸事通鑑系於九年與本紀不同

番禺夷王仲宣反嶺南首領多應之引兵圍廣州韋洸中流矢卒詔以其副慕容三藏檢校廣州道行軍事又詔給事郎裴矩巡撫嶺南進至南海高梁洸夫人遣其孫馮暄救廣州暄與賊將陳佛智素善逗留不進夫人知之大怒遣使執暄

繫州獄更遣孫盎出討佛智斬之與慕容三藏合擊仲宣仲宣眾潰廣州獲全通鑑

嶺南酋長王仲宣反圍廣州詔令韋洸為行軍總管慕容三藏為副至廣州與賊戰洸為流矢所中卒詔令三藏檢校廣州道行軍事十年賊眾四面攻圍三藏固守月餘糧少矢盡三藏以為不可持久自率驍駃夜出擊之賊眾敗散廣州獲全隋書慕容三藏傳

十二年正月以宣州刺史席代雅為廣州總管五月代雅卒高祖紀

煬帝大業元年番禺獠作亂命車騎將軍薛世雄討平之黃通志

薛世雄開皇時數有戰功累遷儀同三司右親衛車騎將

軍煬帝嗣位番禺夷獠作亂詔世雄討平之薛世雄傳

十三年銑使魯王張繡新舊唐書作齊王徇嶺南欽州刺史甯長真

附於銑漢陽太守馮盎以蒼梧高涼珠崖番禺之地附於林

士宏通鑑

林士宏操師乞隋書作操天成起為盜大業十二年據豫章隋遣

治書御史劉子詡討賊射殺師乞士宏收其眾自號南越

王北盡九江南海番禺悉有之劉昫舊唐書林士宏傳

蕭銑梁宣帝曾孫煬帝以外戚擢為羅州令大業十三年

沛人張繡等謀反推為主僭稱帝隋將張鎮州王仁壽擊

銑不能克及隋亡與甯長真等率嶺南州縣降於銑舊唐書蕭

統傳

南海譚宗浚分纂 南海梁 起初校 順德盧乃潼再校
番禺史悠履三校 順德羅 槩四校
廣州府志卷七十五終

廣州府志卷七十六

前事畧二

唐

五代梁

南漢

宋

唐

高祖武德三年左武衛大將軍馮盎擊高法澄洗寶徹擒之
黃通志

廣新二州賊帥高法澄洗寶徹殺隋官吏據州附於林士
宏盎擊破之既而寶徹兄子智臣復聚兵於新州盎引兵
擊之兵始合盎免胄大呼曰爾識我乎賊多棄仗肉袒而
拜遂潰擒寶徹智臣等嶺外遂定通鑑
或說盎曰隋季崩蕩海內震騷唐雖應運而風教未孚嶺
越無所繫屬公克平二十州拓地數千里名位未正請上
南越王號盎曰吾居越五世矣牧伯惟我一姓子女玉帛

吾有也人生富貴如我希矣常恐忝先業尙敢自王哉唐新

書馮
益傳

四年河間王孝恭獻平蕭銑之策高祖嘉納之統水陸十二
總管發自硤州孝恭分遣撫慰嶺南四十九州皆欵附舊唐
書李

孝恭
傳

九月蕭銑黃門侍郎劉洎畧地嶺表得五十餘城未還而銑

敗洎以城來降通鑑

五年廣州賊帥鄧文進降通鑑

謹案阮通志云煬帝幸江都時鄧文進據廣州它無
可考

六年七月岡州刺史馮士翽據新會反廣州刺史劉感討平
之使復其位通鑑

太宗貞觀元年二月命大加併省因山川形便分為十道十

曰嶺南通鑑

七年七月遣使巡撫嶺南奉使者大理少卿李宏節太子中
允張元素都水使者長孫師三人者皆恤刑獄巡海島奉令

惟謹王欽若等
冊府元龜

十四年三月羅賓二州獫狁反廣州總管黨仁宏敗之新書太
宗紀

十六年冬十月廣州都督黨仁宏有罪徙欽州黃通
志

高祖之入關也黨仁宏將兵二千人歸高祖於蒲阪厯南
甯戎廣州都督為人所訟贓百餘萬罪當死上宥之召五
品以上謂曰法者人君所受於天不可以私今朕私黨仁
宏而欲赦之是自亂其治上負於天欲席藁於南郊三日
日一進蔬食以謝罪羣臣以為自貶太過頓首固請上乃

降手詔曰朕有三罪知人不明一也以私亂法二也善善未賞惡惡未誅三也於是黜仁宏為庶人徙欽州通鑑

高宗麟德二年鳳翔於增江增城志

四月曲赦桂廣黔三都督府管內大辟罪以下高宗紀

上元三年八月置南選使簡補廣交黔等州官吏高宗紀

勅廣桂等都督府比來注擬簡擇未精自今每四年遣五

品以上充使仍令御史同往注擬時人謂之南選通鑑

謹案黃通志載此事在儀鳳元年與阮通志不同蓋

是年十一月改元儀鳳故也阮通志作上元二年亦

誤

中宗嗣聖元年七月廣州崑崙殺其都督元叡新書武后紀

元叡閭儒僚屬恣橫有商舶至僚屬侵漁不已商胡訴於

元叡索枷欲繫治之羣胡怒有崑崙袖劍登廳事殺元叡

及左右十餘人而去無敢近者登舟入海追之不及通鑑

武后垂拱元年九月廣州都督王果討反獠平之通鑑

三年七月兩金於廣州新書武后紀

謹案阮通志據新書作光宅三年然光宅實無三年

也阮通志當誤

八月廣州都督馮元常討安南酋領李嗣仙降其賊黨黃通志

嗣仙殺都護劉延祐劫州縣詔元常討之率士卒航海馳

檄先示禍福賊黨多降唐書馮元常傳

謹案阮通志載此事在長壽三年後無年月今從黃

通志

長壽二年有上封事言嶺表流人有謀逆者乃遣司刑評事

萬國俊攝監察御史就按之至廣州徧召流人擁之水次以次加戮三百餘人一時併命然後鍛鍊曲成反狀舊書刑法志

天后度流人已死又使使者安撫流人曰吾前發十道使安慰流人何使者不曉吾意加殺害深為酷暴其輒殺流人使並所在鎖項將至害流人處斬之以快亡魂諸流人

未死或它事繫者兼家口放還通鑑考異

中宗神龍二年初韋元貞流欽州而卒蠻酋甯承基逼取其女元貞妻崔氏不與承基殺之及其四男洵浩洞泚上命廣

州都督周仁軌斬之以其首祭崔氏墓殺掠其部眾殆盡通鑑元宗開元二年終南山竹有華實如麥嶺南亦然竹竝枯死

是歲大饑民采食之新書五行志四年夏五月遣使求南海珠翠尋罷之黃通志

遣監察御史楊範臣求南海珠翠範臣諫尋罷之大事紀

十五年五月以光王琚為廣州都督五府節度大使元宗紀

十六年正月春瀧等州獠首領瀧州刺史陳行範廣州首領

馮仁智楊思勗傳作馮璘何游魯叛遣驃騎大將軍楊思勗討平之

元宗紀

謹案阮通志云思勗發桂州及嶺北兵討之十二月

擒游魯馮璘行範逃於雲際盤遼二洞生擒斬之詳

人物本傳

開元中市舶使周慶立與波斯僧造奇巧以進侍御史柳澤上書以諫帝嘉納之慶立由是免冊府元龜

柳澤開元中轉殿中侍御史監嶺南道市舶使周慶立造奇器澤上書曰不見可欲使心不亂是見可欲而心必亂

矣慶立雕製詭物造作奇器乃治國之巨蠹明主所宜嚴
罰者也慶立求媚聖意搖蕩上心是禁典之所無赦陛下
新即位固宜昭宣菲薄廣示節儉豈可以怪好示四方哉
柳澤傳

謹案黃通志載此事於開元二年不知何本

天寶二載冬十二月海賊吳令光作亂新書元宗紀

天寶三載二月舊書作四月南海太守劉巨鱗討吳令光閏月令

光伏誅新書元宗紀

五載楊貴妃方有寵中外爭獻服器珍玩嶺南經畧使張九
章以所獻精美加三品天下從風而靡妃欲得生荔枝歲命
嶺南馳驛致之比至長安色味不變通鑑

六年正月遣御史羅希夷如嶺南殺遷謫者通鑑

時楊國忠頡政殺嶺南流人以中使傳口敕行刑畏議者
嫉其酷乃以宇文審為嶺南監決處置等使活者甚眾胡

省通鑑注

三月南海太守彭杲坐贓決杖長流溱溪郡死於路元宗紀

八載五月南海太守劉巨鱗坐贓決死之元宗紀

十三載秋七月勅南海五府貢舉黃通志

七月勅如聞嶺南州縣近者頓習文傳自今以後其嶺南
五府管內白身有詞藻可稱者每主選補時任令應諸邑
鄉貢舉仍委去使准考試有堪及第者具奏聞有願赴京

者聽冊府元龜

肅宗至德元載正月南陽太守魯炅將嶺南黔中襄陽子弟
五萬人屯葉北以備安祿山元宗紀

吳升五府經畧討擊使為廣南節度使領廣韶循潮康瀧
端新封勤羅潘高恩雷岷瓊振儋萬安軍二十二州治廣
州通鑑

乾元二年九月廣州奏大食國波斯國攻城刺史韋利見棄
城遁十月以濮州刺史張方須為廣州都督五府節度使肅宗

代宗廣德元年十二月宦官市舶使呂太一逐嶺南節度使

張休新書作張體縱下大掠代宗紀

謹案阮通志云新書作十一月甲辰舊書作十二月

甲辰考是年十二月無甲辰似誤

大曆二年四月以工部侍郎徐浩為廣州刺史嶺南節度觀

察使代宗紀

常袞宣慰嶺南制敕理天下者宜務於遠安本人情者必
合其上達或刑罰不中德言未孚則生怨咨是有申論朕
以服嶺之表方隅之大南盡百越專制萬里擇將置守常
亦難之至於遐遺屢有明誠俾施惠政以恤疲人而長吏
議法不平作威以逞因其猜阻陷我忠良馮季康何如暎
等南方右族累代純臣協其義烈之心積有艱危之効惑
於所譖虐用其刑無狀致辟遂生邊患朕自託人上每勞
日昃法天地之生成宏父母之慈愛聞此濫刑惕然疚懷
尋亦辯明特合昭雪如聞溪洞尚有分擾哀我庶士勞於
甲兵豈不求安良有以也所以更謀良帥先用舊德兼御
史大夫徐浩歷典中外長於撫馭素所親信俾其鎮輯元
冬之首當至彼方必大布風化永清麾管仍命尙書比部

員外郎莫藏用往嶺南宣慰問以疾苦弔其死喪其季康等遇害之家躬自存撫切加贍恤務令得所以慰孤遺其軍州所有結聚申明中旨懸示大信但能歸附卽是平人豈惟復業安居亦當隨才命職兼至貴州宣慰水旱所損或須蠲免宜與觀察使處置勉膺朝廷以稱朕懷全唐文欽定

三年十月以京兆尹李勉爲廣州刺史充嶺南節度使代宗紀

四年廣州人馮崇道桂州人朱濟時反容管經畧使王翊敗之新書代宗紀

番禺賊帥馮崇道桂州叛將朱濟時爲亂陷沒十餘州李

勉至遣將李觀與容州刺史王翊併力招討悉斬之五嶺

平李勉傳

七年十月以太府卿呂崇賁爲廣州都督充嶺南節度使以

嶺南節度使李勉爲工部尙書代宗紀

八年九月嶺南節度使呂崇賁爲部將新書作循州刺史哥舒晃所

殺十月以江西觀察使路嗣恭爲廣州刺史充嶺南節度使

封冀國公代宗紀

十年十月路嗣恭破廣州擒哥舒晃斬首以獻代宗紀

哥舒晃反詔加嗣恭兼嶺南節度觀察使嗣恭擢流人孟

瑤敬冕使分其務瑤主大軍當其衝冕自問道入招集義

勇得八十人撓其心腹二人皆全策詭計出其不意遂斬

晃誅同惡萬餘人築尸爲京觀路嗣恭傳

節度副使伊慎以水陸士徒分道潛行晃謀主蘇渙騎將

王朋悅皆據要害慎曰寇不可玩乃扼其喉而潰其腹斬

首三千級下韶州明年戰於濫江口又明年軍於胥口於

端州戰於潮陽次於交廣十月斬晃於甘溪上功拜連州刺史慎本晃降將嗣恭子恕從討晃授檢校工部員外郎得從便宜擢慎用之賊平恕功最多文苑英華

十二年五月以前安南都護張伯儀為廣州刺史兼御史大夫充嶺南節度使代宗

十三年十二月以嶺南觀察使路嗣恭為兵部尚書代宗

路嗣恭新書字京兆三原人始名劍客歷仕郡縣有能名

大業八年哥舒晃反詔加嗣恭嶺南節度觀察使斬晃及

誅其同惡萬餘人築為京觀俚洞之宿惡者皆族誅之五

嶺削平廣州商舶之徒多因晃事誅之前後沒其家財寶

數百萬貫盡入私室不以貢獻代宗甚銜之故雖有功止

轉兵部尚書無所酬勞子恕字體仁路嗣恭傳

路嗣恭初平五嶺元載奏言嗣恭多取南人金寶是欲為

亂陛下不信試召必不入朝唐語林補遺

十三年上召江西判官李泌入見言朕面屬卿於路嗣恭

而嗣恭取元載意奏卿為虔州別駕嗣恭初平嶺南獻琉

璃盤徑九寸朕以為至寶及破載家得嗣恭所遺琉璃盤

徑尺俟其至當與卿議之泌曰嗣恭新立大功豈得以一

琉璃盤罪之耶上意乃解以嗣恭為兵部尚書通鑑

謹案阮通志云語林通鑑二說不同檢舊書嗣恭傳

嗣恭為江南西道觀察時杖殺元載私人賈明觀識

者稱之據此則不附元載明矣豈至嶺南畏載權勢

又以珍寶啗之耶嗣恭雖有戰功然無政績可紀故

附錄於此

德宗建中三年以嶺南節度使張伯儀檢校兵部尚書荆南

節度使以容管經畧使元琇為廣州刺史嶺南節度使德宗

興元元年三月以前饒州刺史杜佑為廣州刺史嶺南節度

使德宗

貞元三年五月以嶺南節度使杜佑為尚書右丞以容管經

畧使王錡為廣州刺史嶺南節度使德宗

八年九月以太子賓客薛珏為嶺南節度使德宗

十一年正月嶺南節度使薛珏卒以邕管經畧使王錡為廣

州刺史嶺南節度使德宗

十四年八月廣州大風壞屋覆舟新書五行志

十七年夏五月以工部侍郎趙植為廣州刺史兼御史大夫

嶺南節度使德宗

十八年七月以邕管經畧使徐申為廣州刺史節度使德宗

前節度使趙植卒於官軍吏乘機竊發印符易置部校拔

用惡少年百輩軍中幾亂相率亡命申至即捕誅首惡悉

原諸誑誤者人心遂安文苑英華

憲宗元和元年四月以前安南經畧使趙昌為廣州刺史嶺

南節度使前嶺南節度使徐申卒憲宗

三年四月以嶺南節度使趙昌為江陵尹荆南節度使以戶

部侍郎楊於陵為廣州刺史嶺南節度使憲宗

廣南山南東西皆旱新書五行志

四年閏三月禁嶺南黔中掠良民為奴婢者六月禁錢不得

過嶺南憲宗

五年三月以太子賓客鄭綱檢校禮部尚書廣州刺史嶺南

節度使憲宗紀

夏四月南海民一產三子黃通志

柳宗元為廣南節度使鄭綱奏狀右臣所部貞節坊百姓某妻產三男者臣詳究往例實謂休徵已量事給絹三十疋充其乳養者伏以陛下勤郵黎元感通天地靈心昭答景福已興方使億兆繁滋區夏充牣故表祥於字育是啟運於昇平事查化源慶延邦本麟羽之瑞曾何足云臣幸列藩維嘗叨樞近私賀之至柳河東先生集

七月夏五月南海溢黃通志

八年十二月以桂管觀察使馬總為廣州刺史嶺南節度使

憲宗紀

廣州饑新書五行志

謹案黃通志載此事在七年誤

九年三月妖人梁叔高自廣州來授書與吏部侍郎楊於陵使為已輔於陵執之以告殺之五月以嶺南節度使鄭綱為工部尚書憲宗紀

十二年七月嶺南節度使崔詠卒以國子祭酒孔戣為廣州

刺史嶺南節度使憲宗紀

十五年九月以將作監崔能為廣州刺史嶺南節度使以前嶺南節度使孔戣為吏部侍郎穆宗紀

謹案黃通志載此事在長慶元年九月考韓昌黎唐正議大夫尚書左丞孔公墓志銘云十五年遷尚書吏部侍郎與唐書合然則黃通志誤也

穆宗長慶三年夏四月以鄭權為嶺南節度使通鑑

宦者王守澄專制國事勢傾中外鄭注日夜出入其家與之謀議關通賂遺工部尚書鄭權家多姬妾祿薄不能贍

因注通守澄以求節鎮已西以權為嶺南節度使通鑑

初權出鎮有中人之助南海多珍貨權頗積聚以遺之大

為朝士所嗤舊唐書鄭權傳

四年十月以鄂岳觀察使崔植檢校吏部尚書兼廣州刺史

御史大夫嶺南節度觀察經畧使穆宗紀

敬宗寶曆二年三月嶺南節度使崔植奏廣潮封雷潘辨等

七州戍軍除折衝別將外並請停從之敬宗紀

十一月以戶部尚書胡証檢校兵部尚書兼廣州刺史嶺南

節度使敬宗紀証陪歛財貨起甲第連巨閭巷車服器用窮極奢侈議者

罪之其後甘露之變禁兵以証家鉅富利其財入其家殺

其子激冊府元龜

文宗太和九年以桂管觀察使李從易為廣州刺史嶺南節

度使十二月嶺南節度使李從易卒以華州刺史盧鈞為廣

州刺史嶺南節度使文宗紀

武宗會昌二年安南亂經畧使武渾奔廣州黃通志

安南經畧使武渾役將士治城將士作亂燒城樓劫府庫

渾奔廣州監軍段士則撫安亂眾通鑑

宣宗大中九年閏四月禁嶺外民鬻男女者新書宣宗紀

十二年四月嶺南軍亂逐其節度使楊發宣宗紀

嶺南都將王令寔作亂囚發五月以涇原節度使李承勛

為嶺南節度使發鄰道兵討平之通鑑

懿宗咸通三年以邕管經畧使鄭愚為廣州刺史充嶺南東道觀察處置使

懿宗紀

五月勅嶺南分為五管誠已多年居常之時同資禦捍有事之際要別更張邕邑西接南蠻深據黃洞控兩江之獮俗居數道之游民比以委人太輕軍威不振境連內地不並南海宜分嶺南為東西道節度觀察處置等使以廣州為嶺南東道邕州為嶺南西道別擇良吏付以節旄以邕管經畧使鄭愚為廣州刺史嶺南東道節度觀察處置使

懿宗紀

謹案阮通志云通鑑嶺南節度使蔡京奏分嶺南為兩道從之五月敕以嶺南節度使韋宙為東道節度使以蔡京為西道節度使通鑑本之新書舊書云以

鄭愚為東道節度使宋戎為西道節度使二說互異計有功唐詩紀事云鄭愚廣州人宋戎以安南方亂憚行而愚以本貫難以行事遂以蔡京代戎而韋宙是時在江西平亂有功欲使宙代鄭愚猶未有命也

四年秋七月詔福建餽運至廣州

黃通志

南蠻陷交趾徵兵赴嶺南詔湖南水運自湘江入潯渠以饋行營湘灘沂運功役艱難軍屯廣州乏食潤州人陳磻石上書言江西湖南運糧不濟軍師臣有奇計以饋南軍召見奏臣弟聽思曾任雷州刺史家人隨海船至福建大船一隻可致千石自福建不一月至廣州得船數十艘可致三萬石執政是之以磻石為鹽鐵巡官專督海運

懿宗紀

有司以和雇為名奪商人舟委貨於岸側舟入海或遇風

濤沒溺有司囚繫網吏舟人使償其米軍食雖足人頗苦之通鑑

十二年十二月以檢校戶部尚書汴州刺史御史大夫宣武軍節度使鄭從讜為廣州刺史嶺南東道節度觀察等使懿宗

僖宗乾符六年五月黃巢陷廣州執嶺南東道節度使李迢

十一月黃巢殺李迢僖宗紀

黃巢陷桂管進寇廣州貽節度使李迢書求表為天平節度又脅崔瑒言於朝宰相鄭畋欲許之盧携田令孜執不可巢又丐安南都護廣州節度使書聞右僕射于琮議南海市舶利不貲賊得益富而國用屈乃拜巢率府率巢見詔大詬急攻廣州執李迢自號義軍都統黃巢傳

黃巢在嶺南士卒罹瘴疫死者什三四其徒勸之北還以圖大事巢從之自桂州編大柁數十乘暴水沿湘江而下歷衡永州癸未抵潭州城下李係嬰城不敢出戰巢急攻一日陷之係奔朗州通鑑

黃巢入廣州執李迢隨軍至荊州合迢草表述其所懷迢曰某骨肉滿朝世受國恩腕即可斷表終不為領於江津害之北夢瑣言

謹案阮通志云新書黃巢傳廣明元年黃巢破潭州其年十月巢據荆南脅李迢草表報天子迢曰吾腕可斷表不可為巢怒殺之是巢在廣州挾迢踰嶺至潭州乃殺之而本紀謂迢之死在乾符六年自相牴牾無書可考以上阮通志考新書黃巢傳載巢急攻廣州

執李迢自號義軍都統會賊中大疫眾死什四遂北引還自桂編大桴沿湘下衡永破潭州據荆南殺李迢俱在乾符六年與本紀未嘗牴牾阮通志誤耳至續寶運錄謂廣明元年巢在廣州則通鑑考異已詳辨之今不取

廣明元年正月免嶺南賦稅十之四信宗紀

中和三年夏六月以廣州牙將劉謙為封州刺史黃通志

劉知謙壽州上蔡人避亂客封州為清海牙將節度使章宙以兄女妻之眾謂不可宙曰若人狀貌非常吾以子孫託之黃巢自嶺表北還湖湘間羣盜蟻結知謙因據有封州有詔即授刺史兼賀水鎮使以遏梧桂知謙撫納流亡愛裔用度養士卒未幾得精兵萬人多具戰艦境內肅然

唐書劉知謙傳

謹案唐書本傳作劉知謙韋丹傳作劉謙按十國紀年云劉謙望字德光亦名知謙後止名謙諸書所載據其後改之名也

文德元年二月保鑾都將黔中節度使李鋌檢校司空廣州

刺史嶺南東道節度使信宗紀

昭宗大順元年冬十月以檢校戶部尚書劉崇龜為嶺南東

道節度使兼觀察處置等使黃通志

崇龜至廣州始修理城隍拊恤瘡痍嶺海靖安民夷賴之

黃通志

昭宗乾甯元年冬封州刺史劉謙卒子隱居喪於賀江土民百餘人謀亂隱一夕盡誅之嶺南節度使劉崇龜召補右都

押牙兼賀水鎮使未幾表為封州刺史通鑑

知謙疾病召諸子曰今五嶺盜賊方興吾有精甲犀械爾

勉建功時哉不可失也知謙卒共推其子隱為嗣唐書劉

二年秋七月以薛王知柔為清海節度使是年賜嶺南節度使軍額曰清海

同平章事仍權知京兆尹判度支充鹽鐵轉運使俟反正日

赴鎮通鑑

三年正月制以特進戶部尚書兼京兆尹嗣薛王知柔檢校

司徒兼廣州刺史御史大夫清海軍節度嶺東道觀察處置

等使昭宗紀

薛王知柔行至湖南廣州牙將盧琚譚宏玘據境拒之使

宏玘守端州宏玘結封州刺史劉隱許妻以女隱偽許之

託言親迎伏甲舟中夜入端州斬宏玘遂襲廣州斬琚具

軍容迎知柔視事表隱為行軍司馬通鑑

謹案唐書通考有盧琚而無譚宏玘薛史冊府元龜

九國志作譚玘去上一字避宋宣祖諱也歐史作覃

玘

光化元年十二月韶州刺史曾衮舉兵攻廣州州將王瓌帥

戰艦應之清海行軍司馬劉隱一戰破之韶州將劉潼復據

湏洽隱討斬之通鑑

三年九月制開府儀同三司守太保兼門下侍郎同平章事

諸道鹽鐵轉運使上柱國齊國公徐彥若可檢校太尉同平

章事清海軍節度嶺南東道管内觀察處置供軍糧料等使

昭宗紀

十二月清海軍節度使薛王知柔薨通鑑

天復元年十二月清海節度使徐彥若薨遺表薦行軍司馬

劉隱權留後通鑑

徐彥若代知柔表隱節度副使委以軍政彥若卒軍中推

為留後歐史南漢世家

天祐元年以崔遠為清海軍節度使受命不行黃通志

冬十二月朱溫以劉隱為清海軍節度使黃通志

朝廷以兵部尚書崔遠為清海節度使遠至江陵聞嶺南

多盜且畏隱不受代不敢前朝廷召還隱遣使以重賂結

朱全忠乃奏以隱為清海節度使通鑑

二年加劉隱同平章事十國春秋

五代梁

梁太祖開平初隱屢上書勸進元年五月以擁戴功加檢校

太尉兼侍中封大彭王十國春秋

十月廣州進獻助軍錢二十萬又進龍腦腰帶珍珠玳瑁

香藥等十一月廣州進龍形通犀腰帶金託裏舍稜玳瑁器

百餘副廣南管內獲白鹿圖形來獻耳有兩缺十國春秋

二年十月以劉隱為清海靜海節度使以膳部郎中趙光裔

右補闕李殷衡充官告使殷衡德裕之孫也隱皆留之通鑑

謹案阮通志云是時曲顥為靜海節度梁不能制雖

有是授而隱終不能得安南也

三年四月制廣州節度使劉隱封南平王舊五代史太祖紀

四年四月進封劉隱為南海王王溥五代會要

謹案宋史云開平初封南海王無封大彭南平事東

都事畧通考隆平集並云開平初封南平王無封大

彭南海事通鑑開平元年五月封大彭王三年四月封南平王無封南海事冊府元龜開平初封大彭王梁祖郊禋禮畢進封南海王無封南平事歐史開平三年封南平王乾化元年封南海王五代會要開平三年四月封南平王四年四月封南海王俱無封大彭事惟九國志開平元年封大彭王三年改封南平王四年進封南海王三者俱載薛史於梁太祖紀云開平三年四月甲寅封南平王於劉陟傳云梁開平初封大彭郡王梁祖郊禋禮畢進封南海王亦三者備載而詳畧互見故阮通志從之

七月廣州貢犀玉獻舶上薔薇水

舊五代史太祖紀

乾化元年

五月朔改元

詔劉隱賜一子六品正員官

舊五代史太祖紀

五月清海軍節度使守侍中兼中書令劉隱薨輟朝三日百僚詣閣門奉慰

舊五代史太祖紀

僚詣閣門奉慰

舊五代史太祖紀

謹案隱卒年月薛史本紀與諸書同而僭偽傳又云開平四年三月隱卒吳任臣云以三月為五月者蓋以聞訃之日為斷也

隱病亟表其弟節度副使巖權知留後五月以巖為節度使巖多延中國士人置於幕府出為刺史無武人

是歲閩遣員外郎崔某表祭

十國春秋

祭文曰惟靈五羊粵區番禺巨壤漢為列郡唐作雄藩總百蠻五嶺之英有出將入相之盛是故地啟嘉數天生大賢濬六韜三畧之才謀擅五袴二天之政術俾其於家受詔衣錦馮牙控二十四州之繁難當二十八齒之美茂光

揚千古冠絕一時至若恢張霸業揚簸清波臺陟九層靡
媿郭隗劍提三尺授自呂虔爰持副貳之雄姿遂領節旄
之重寄繇是澤施甘露金肅秋霜掀文房武庫以連雲騰
逸氣英風而偃草上楊則阮瑀下賢則左車從善則軾聞
宣威則斷案故得越伏波之銅柱獻欵而來感鄂公之鐵
鞭呈祥以見火山改色珠浦生光無煩處默之酌泉大鄙
趙佗之累土然後鳴鐘出入調鼎升聞致交阯之封疆歸
石門之教化九遷渥澤克居浴鳳之池雙立節旄遠過跼
鳶之水雖士鮪列弟兄三地山簡兼荆湘四州語未同年
事推曠世嗚呼是何才德之若彼功業之如此而彼穹者
天不壽其齒天子方欲使降皇華恩宣金冊表裏東周之
盛旌崇南越之隆胡二豎之亟攻竟三醫之莫救泰山頽

壞俄興孔氏之歌漢水淒涼遽罷羊公之市實國家之不
幸實藩鎮之不幸審知早塵興國旋忝睦鄰雖瓊樹之未
親若銅盤之已接方定金蘭之至分豈期幽顯之驟殊况
以幸結良緣累交專介幕下崔員外昨馳禮幣常詣門牆
爰蒙執手之懽宏叙親仁之旨今則遽悲存歿益嘆彭殤
故將薦舉征塵躬申薄奠九泉注望於嘆逝以難勝五月
指期表同盟之必至嗚呼曩時羔雁今遣蘋蘩伊人事之
有茲顧痛傷而何極然則荀龍賈虎大馮小馮雖嗟松壠
之長歸終慶荆枝而繼茂永言懽好詎忘初終幸明靈之
一臨鑒此丹赤嗚呼哀哉

十國春秋

二年除劉巖清海軍節度使檢校太保同平章事歐史
是歲劉巖遣使貢金銀犀角象牙雜寶奇貨名香等於梁價

凡數十萬梁命客省引進使章堅報之堅還復以銀茶等上
獻估值合五百餘萬十國春秋

廣州言白龍見十國春秋

三年加劉巖檢校太傅歐史

未帝乾化三年二月除劉巖清海建武節度使兼中書令龔

封南平王十國春秋

謹案歐史南漢世家云悉以隱官爵授巖龔封南海

王薛史劉陟傳亦云梁末帝嗣位盡以隱之官爵授

巖與歐史合此云南平似誤

四年二月遣供軍巡官陳用拙如吳越是時鬱林州寶圭洞

迎玉宸道君及葛真人石像於南海置之石室十國春秋

貞明元年十二月清海建武節度使兼中書令劉巖以吳越

王鏐為國王而已獨為南平王表求封南越王及加都統不

許巖謂僚屬曰今中國紛紛孰為天子安能梯航萬里遠事

偽庭乎自是貢使遂絕通鑑

謹案薛史劉陟傳謂巖心稱南海之號非南平也吳

錄云天祐十四年南海王劉巖自立為王亦稱巖為

南海王通鑑不載隱封南海事故以巖為龔封南平

王耳吳越國王南平郡王是以恥之

五代 南漢

高祖乾亨元年梁貞明三年八月癸巳巖即皇帝位於番禺國號

大越大赦改元乾亨以梁使趙光裔為兵部尚書節度副使

楊洞潛為兵部侍郎節度判官李殷衡為禮部侍郎並同平

章事建三廟追尊祖安仁曰太祖文皇帝父謙曰代祖聖武

皇帝兄隱曰烈宗襄皇帝以廣州為興王府通鑑

劉巖謙庶子也母段氏生巖於外舍謙妻韋氏素妬聞之怒拔劍而出將殺之及見而悸劍墮地良久曰此非常兒也後三日卒殺段氏養為己子及長善騎射身長七尺垂

手過膝兄隱為行軍司馬巖辟薛王府諮議參軍隱鎮南海巖為副使是時交州曲顥桂州劉士政邕州葉廣畧容

州龐巨昭分據諸管盧光稠據虔州攻嶺上其弟光睦據潮州子延昌據韶州高州刺史劉昌魯新州刺史劉潛及

江東七十餘寨皆不能制隱攻韶州巖曰虔人必應則首尾受敵不宜直攻可以計取隱不聽敗歸因盡以兵事

付巖悉平諸寨歐史南漢世家初謙葬段氏得石版有篆文曰隱台巖因名其三子巖後

名陟梁乾化元年授陟節度使陟復名巖胡三省通鑑注隱好賢士王定保倪曙劉濬李衡周傑楊洞潛趙光胤之

徒隱皆招禮之定保容管巡官曙唐太學博士濬崇望之子以避亂往衡德裕之孫唐右補闕以奉使往皆辟置幕

府待以賓客傑善星厯唐司農少卿因避亂往隱亦容之洞潛初為容管巡官秩滿客南海隱嘗師事之後以為節

度副使及巖僭號為陳吉凶禮法為國制度畧有次序皆用此數人焉歐史南漢世家

越主初欲僭號憚王定保不從遣定保使荆南及還懼其非已使倪曙勞之告以建國定保曰建國自有制度吾人

南門清海軍額猶在四方其不取笑乎越主笑曰吾備定保久矣而不思此宜其譏也歐史南漢世家

謹案趙光裔歐史作光允李殷衡歐史作李衡考舊唐書趙隱傳隱三子光逢光裔光允光允相後唐未嘗至嶺表又新書宰相世系表李德裕生椅渾燁渾比部員外郎燁郴尉生殷衡延古與通鑑合疑皆歐史誤也劉濬為崇望之子十國春秋云崇龜子亦誤

分南海為二縣曰咸甯常康十國春秋

鑄乾亨重寶錢十國春秋

謹案洪遵泉志云重三銖六參

是歲建玉堂珠殿歐史南漢世家

二年十一月祀南郊大赦改國號曰漢通鑑

是歲因國用不足又鑄鉛錢十當一十國春秋

三年正月冊立越國夫人歐史南漢世家氏為皇后

九月梁削巖南平王官爵檄吳越兵來討吳越受命不行通鑑梁末帝命錢鏐進取海南劉巖勅朕聞越紀亂常前王無赦懲惡勸善有國不私苟罪惡以顯新在刑名而何道其有身當殊寵既受國恩敢行不軌之心具驗速辜之跡頒行典憲仍令誥諸靖海建武等軍節度使上柱國平南王劉巖頃因乃父發跡本藩尋賴其兄致身賓席受先朝之拔擢極上將之寵權念其尊獎之誠許繼藩宣之任乃自行軍之職繼膺推轂之恩秩進三司位同四輔自朕獲承大寶累進崇資一門無比其超榮百世豈酬其寵擢而敢飛章不紀希寵無厭始求都統四鄰後請封王南越貪饕斯甚踰僭無階朕每含容再申優渥授之東鎮加以南平迺罔思止足益恣凶狂妄稱漢室遺宗欲繼尉佗醜跡結

連淮海阻塞梯航徒惑遠方僭稱大號在人情而共棄豈
大道以能容宜命討除用清逆亂爾天下兵馬都元帥錢
鏐志扶社稷任總兵師每興憤激之辭願舉誅夷之令是
用俾爾元老討平叛臣先行奪爵之文爰舉擢凶之典劉
巖在身官爵並宜削奪於戲將相重任子孫殊榮不能常
守於藩修而乃自干於國典指凶殘而必取念染污以將
新非我無終始之恩實彼有滿盈之罪凡百珍重悉體朕

懷全唐文

四年三月從兵部侍郎楊洞潛之請始立學校十國春秋
置選部貢舉放進士明經十餘人如唐故事歲以為常歐史南漢

五年梁末帝龍德元年漢以尙書左丞倪曙同平章事通鑑

謹案歐史乾亨元年以倪曙兼工部侍郎同平章事
錢易南部新書劉氏僭號以曙為翰林學士並與通
鑑不同吳任臣云以唐太學博士倪曙為工部侍郎
已又改尙書左丞署百官不云同平章事也歐志似
誤

八年唐莊宗同光二年作南宮王定保獻南宮七奇賦以美之歐史南漢

九年八月白虹入三清殿巖頗懷憂畏詞臣王宏以白虹為
白龍上賦賀之巖大悅改元白龍五國故事

更名龔以應見龍之祥有胡僧言識書滅劉氏者龔也龔
乃採周易飛龍在天之義為龔字音儼以名焉歐史南漢世家

大有元年唐明宗天成三年春行籍田禮舊五代史劉陟傳

楚人以舟師攻封州封州兵敗於賀江龔懼以周易筮之

遇大有遂赦境內改元大有歐史南漢世家

五年唐明宗長興三年是歲立其子耀樞為雍王歐史作邕王龜圖為康

王宏度為賓王歐史作秦王宏熙為晉王宏昌為越王宏弼為齊

王宏雅為韶王宏澤為鎮王宏操為萬王宏杲為循王宏暉

為恩王歐史作息王宏邈為高王宏簡為同王宏建為益王宏濟

為辨王宏道為貴王宏照為宣王宏政為通王宏益為定王

未幾徙宏度為秦王鑑通

七年唐愍帝應順元年廢帝四月立改清泰元年春作殿於內宮曰昭陽殿十國春秋

以金為仰陽銀為地面簷楹榭皆飾以銀殿下設水渠

浸以珍珠又琢以水晶琥珀為日月列於東西二樓之上

親書其榜五國故事

十二月皇后馬氏殂十國春秋

是歲命判六軍秦王宏度募宿衛兵千人

漢主命判六軍秦王宏度募宿衛兵千人皆市井無賴子

弟宏度昵之同平章事楊洞潛諫曰秦王國之冢嫡宜親

端士使之治軍已過矣况昵羣小乎漢主曰小兒教以戎

事過煩公憂終不戒洪度洞潛出見衛士掠商人金帛商

人不敢訴歎曰政亂如此安用宰相因謝病歸第久之不

召遂卒鑑通

九年唐廢帝清泰三年晉高祖天福元年十月以宗正卿兼工部侍郎劉濬為

中書侍郎同平章事鑑通

十年三月漢主以疾愈大赦鑑通

十二年龔所署平章事趙光裔卒復以其子損代之黃通志

初光允裔當作自以唐甲族恥事偽國常怏怏思歸漢主乃

習為光允手書遣使間道至洛陽召其二子損益并其家

屬皆至光允驚喜為盡心焉歐史南漢世家

光裔相漢二十餘年府庫充實邊境無虞及卒漢主復以

其子損同平章事通鑑

十三年門下侍郎同平章事趙損卒以甯遠節度使王定保

為中書侍郎同平章事通鑑

十四年中書侍郎同平章事王定保卒南漢紀

十五年三月漢高祖寢疾以其子秦王宏度晉王宏熙皆驕

恣少子越王宏昌孝謹有智識與右僕射兼西御院使王翽

歐史作王翽謀出宏度邕州宏熙容州而立宏昌制命將行會崇

文使蕭益入問疾以其事訪之益曰立嫡以長違之必亂乃

止丁丑高祖殂通鑑

龔病臥寢中召右僕射王翽與語呼洪度洪熙小字曰壽

隼雖長然皆不足任吾事惟洪昌類我吾欲立之奈何吾

子孫不肖後世如鼠入牛角勢當漸小爾泣下欲歔翽為

謀出洪度於邕州洪熙容州然後立洪昌為太子議已定

崇文使蕭益入問病龔以告之益諫曰少者得立長者爭

之禍始此矣由是洪度卒得立歐史南漢世家

龔初生有日者視之謂謙曰公之諸子惟少者貴耳五國故事

龔性聰悟而苛酷為刀鋸支解剝剔之刑每視殺人則不

勝其喜不覺朶頤垂涎呀呷人以為真蛟蜃也又性好夸

大嶺北商賈至南海者多召之使升宮殿示以珠玉之富

自言家本咸秦恥王蠻夷呼唐天子為洛州刺史歐史南漢世家

漢主末年尤猜忌以士人多為子孫計專任宦官由是國

中宦者大盛通鑑

殤帝光天元年晉高祖天福七年二月秦王宏度即皇帝位更名玠

改元曰光天尊母趙昭儀為皇太妃以晉王洪熙輔政歐史南漢

八月葬天王大帝於康陵十國春秋

家世謹案曝書亭集云南漢主劉龔葬番禺縣治東二十

里北亭有碑一具書翰林學士知制誥正議大夫尚

書右丞上紫金魚袋臣盧應奉勅撰文曰惟大有十

五年歲次壬寅四月甲寅朔廿四日丁丑高祖天皇

大帝崩於正寢越光天元年五月癸未朔十四日丙

申遷神於康陵禮也云云據碑則葬在五月非八月

審矣然曝書亭所載與廣語皇華紀聞均微有不同

且得之傳述未審確否今具錄之以備參檢

二年晉出帝稱天福八年三月丙戌漢主遇弒九國志

漢殤帝驕奢不親政事高祖在殯作樂酣飲與倡婦微行

俚男女而觀之左右忤意輒死無敢諫者惟越王宏昌及

內常侍吳懷恩屢諫不聽常猜忌諸弟每宴集合宦者守

門羣臣宗室皆露索然後入晉王宏熙欲圖之乃盛飾聲

伎娛悅其意以成其惡漢主好手搏宏熙令指揮使陳道

庠引力士劉思潮譚合禮林少強少良何昌廷等五人習

手搏於晉府漢主聞而悅之與諸王宴於長春宮觀手搏

至夕漢主大醉宏熙使道庠思潮等掖漢主因拉殺之盡

殺其左右明旦百官諸王不敢入宮越王安昌帥諸弟臨於寢殿年二十四諡曰殤

歐史南漢世家

吳懷恩番禺人事龔為內府局丞性謹愿典宿衛二十餘年未嘗有小過玠襲位遷內常侍玠好宴樂東西兩教坊伶官千餘人常晝夜出入宮中懷恩屢言於玠曰今禁中自有簫韶府內樂百餘人皆善音律夜宴用此足矣焉用教坊若夜雜入禁中不拘闌籍恐姦人竊發不可不慎玠不聽未幾果為陳道庠所弒

九國志

中宗應乾元年

以三月改元即晉出帝八年

三月越王安昌迎宏熙即皇

帝位更名晟改元應乾以宏昌為太尉兼中書令諸道兵馬都元帥知政事循王安杲為副元帥參預政事陳道庠及劉思潮等皆受賞賜甚厚

通鑑

五月晟殺其弟宏杲

黃通志

漢中宗既主國國中議論詢循王安杲請斬劉思潮等以謝中外漢主不從思潮等聞之潛宏杲謀反漢主令思潮等同之宏杲方宴客思潮與譚令禪帥衛兵突入斬宏杲於是漢主謀盡誅諸弟以越王安昌賢尤忌之建武節度使齊王宏弼自以居大鎮懼禍求入朝許之

通鑑

謹案九國志云洪杲與親信飲酒第中思潮與譚令禪領衛兵排闥入斬其首以徇歐史南漢世家云晟使使者夜召洪杲洪杲知不免乃留使者入具沐浴詣佛前祝曰洪杲誤念來生至宮今見殺矣後世當生民家以免屠害因涕泣與家人訣別然後赴召至則殺之二說不同溫公通鑑與九國志合今從之

十月命韶王宏雅致仕通鑑

十一月漢主祀南郊大赦改元乾和通鑑

羣臣上尊號曰大聖文武大明至道大光孝皇帝歐史南漢世家

謹案鍾允章碧落洞天記作大聖文武元德大明至

道大廣孝皇帝與此不同錄以備考

乾和二年晉出帝開運元年三月漢主命中書令都元帥越王宏昌

謁烈宗陵於海曲至昌華宮使盜殺之通鑑

以戶部侍郎陳偓同平章事通鑑

六月幽齊王宏弼於私第通鑑

十月漢主毒殺鎮王宏澤於邕州通鑑

鎮王宏澤居邕州有善政是歲鳳凰見邕州晟怒使人醜

殺之歐史南漢世家

三年八月殺韶王宏雅通鑑

九月殺劉思潮林少強林少良何昌廷以右僕射王翺嘗與

高祖謀立宏昌出為英州刺史未至賜死通鑑

謹案歐史云殺劉思潮等五人通鑑所載僅四人以

十國春秋考之疑當尚有譚令禪一人通鑑脫誤耳

四年九月漢主族陳道庠及鄧伸通鑑

思潮等死陳道庠懼其友鄧伸以苟悅漢紀遺之道庠莫

曉伸罵曰慙獠韓信誅而彭越醢皆在此書矣道庠悟益

懼晟聞之大怒以道庠伸下獄皆斬於市夷其族歐史南漢世家

謹案殺道庠鄧伸事歐史在三年通鑑在四年五國

故事則云晟既懼道庠欲其自退乃賜之漢紀一部

以當日情事考之殊不相似今從新五代史

五年漢高祖稱天晟弟洪弼洪道洪益洪濟洪簡洪暉洪熙

同日見殺歐史南漢世家

是歲置湯獲鍊牀劓剔等刑號曰生地獄十國春秋

八年漢隱帝乾祐二年以宮人盧瓊仙黃鶴芝為女侍中朝服冠帶

參決政事十國春秋

九年周太祖廣順元年遣巨艦指揮使暨彥贊以兵入海掠商人金

帛作離宮游獵有南宮大明昌華甘泉玩華秀華玉清太微

諸宮凡數百不可悉紀歐史南漢世家

十一年晟病甚封其子繼興衛王璇興桂王慶興荆王保興

祥王祥王疑當作禎王歐史南漢世家崇興梅王漢世家

癸亥大赦十國春秋

十二年周世宗顯德元年正月晟親耕籍田歐史南漢世家

晟殺其弟洪邈歐史南漢世家

漢主以高王洪邈為雄武當作建武節度使鎮邕州洪邈以齊

鎮二王相繼死於邕州固辭求宿衛不許至鎮委政僚佐

日飲酒禱鬼神或上書誣洪邈謀作亂戊午遣甘泉宮使

林延遇賜酖殺之通鑑

十三年南漢主殺禎州節度使通王宏政高祖之子盡矣通鑑

十四年甘泉宮使林延遇卒十國春秋

初閩惠宗娶烈宗女清遠公主使宦者閩清林延遇置邸

於番禺專掌國信高祖賜以大第廩賜甚厚數問以閩事

延遇不對退謂人曰去閩語聞去越語越處人宮禁可知

是乎高祖聞而賢之以為內常侍鉤校諸司事及聞惠宗

遇弒求歸不許素服向其國三日哭延遇陰險多計數漢

主倚信之誅滅諸弟皆延遇之謀也及卒國人相賀延遇病甚薦內給事龔澄樞自代漢主即日擢澄樞知承宣院

及內侍省

通鑑

十五年十二月中書侍郎同平章事盧膺卒

通鑑

十六年八月辛巳漢主殂

通鑑

世宗平江北晟始惶恐遣使修貢於京師為楚人所隔使者不得行晟憂形於色又嘗自言知星未年月食牛女間出書占之歎曰吾當之矣因為長夜之飲十六年春卜葬域於城北運甓為壙晟親臨視之是秋卒年三十九諡曰文武聖明孝皇帝廟號中宗陵曰昭陵

歐史南漢世家

晟既弒兄立不順懼眾不服乃益峻刑法以威眾宦者林延遇宮人盧瓊仙內外專恣為殺戮晟不復省嘗夜飲大

醉以爪置伶人尚玉樓頂拔劍斬之以試劍因并斬其首

明日酒醒復召玉樓侍飲左右曰已殺之晟歎息而已

歐史

南漢世家

漢主每宴會則獨處殿庭間侍宴臣僚皆結彩亭列坐殿之兩隅宴酣則有司以檻獸進兩旁翼以戈戟漢主親持弓矢下殿逡巡獸出移庭而上引弓射之兩旁戈戟競進獸乃斃其為樂多類此

五國故事

八月後主即帝位更名銀改元大寶時年十六國事皆決於宦官玉清宮使龔澄樞及女侍中盧瓊仙等臺省官備位而

已

通鑑

銀晟長子也初名繼興封衛王龔位後改今名改元大寶性昏懦委政宦官龔澄樞及才人盧瓊仙日與官人波斯

女等遊戲又有梁山師馬媪之徒出入宮掖宮中婦人皆

具冠帶領外事宋史劉

宦者陳延壽引女巫樊胡子自言玉皇降胡子身張於內

殿設帳幄陳寶貝胡子冠遠游冠衣紫霞裙坐帳中宣禍

福呼張為太子皇帝國事皆決於胡子瓊仙澄樞爭附之

胡子乃言澄樞等皆上天使來輔太子有罪不可問歐史南漢

世家

初高祖雖寵任中官其數裁三百餘位不過掖庭諸局令

丞至中宗時千餘人稍增內常侍諸謁者之稱至是漸至

七千餘有為三師三公者但其上加內字諸使名不翅二

百女官亦有師傅令僕之號目百官為門外人宋史劉

大寶二年周世宗顯以中書舍人鍾允章藩府舊僚擢為尚

書右丞參政事通鑑

允章請誅亂法者數人以正綱紀漢主不能從宦官聞而

惡之南漢

張殺其所署尚書右丞鍾允章黃通

南漢主將祀圓丘前三日允章帥禮官登壇四顧指揮設

神位內侍監許彥真望之曰此謀反也即帶劍登壇允章

叱之彥真馳入宮告允章欲於郊祀日作亂南漢主曰朕

待允章厚豈有此耶玉清宮使龔澄樞內侍監李託等共

證之以彥真言為然乃收允章繫合章樓下命宦者與禮

部尚書薛用丕雜治之用丕素與允章善告以必不免允

章執用丕手泣曰老夫今日猶机上肉耳分為仇人所烹

但恨邕昌幼不知吾冤及其長也公為我語之彥真聞之

罵曰反賊欲使其子報仇耶復白南漢主曰允章與二子

共登壇潛有所禱俱斬之自是宦官益橫未幾以龔澄樞

為左龍虎觀軍容使內太師軍國之事皆取決焉凡羣臣

有才能及進士狀頭或僧道可與談者皆先下蠶室然後

得進亦有自官以求進者亦有免死而官者由是宦者近

二萬人貴顯用事之人大抵皆宦者也謂士人為門外人

不得預事卒以此亡國通鑑

宋

太祖建隆元年銀大寶三年漢主殺其弟桂王璇興歐史南漢世家

宦者陳延壽言於漢主曰陛下所以得立由先帝盡殺羣

弟故也漢主以為然三月殺其弟桂王璇興李壽續資治通鑑長編

二年銀大寶四年芝茵生宮中野獸觸寢門苑中羊吐珠并旁石

自立行百餘步而仆樊胡子皆以為符瑞諷羣臣入賀歐史南漢

世家

三年銀大寶五年張以宦者李託養女為貴妃專寵託為內太師

居中專政許彥真惡澄樞等居已上謀殺之澄樞使人告彥

真謀反族誅之歐史南漢世家

許彥真既殺鍾允章益恣橫惡龔澄樞等居已上頗侵其

權澄樞怒會有告彥真與先主麗妃私通者澄樞發其事

彥真懼與其子謀殺澄樞澄樞遣西班將軍王仁遇告彥

真父子謀反下獄族誅之李壽續資治通鑑長編

是時城以內行乾亨鉛錢城以外行銅錢犯禁者罪至死百

官俸祿給銅錢者多出自上恩焉十國春秋

乾德元年張大寶六年是時作燒煮剝剔刀山劍樹之刑或令罪

人鬥虎抵象又賦領繁重瓊人米斗稅五錢置媚川都定其

課令入海五百尺採珠所居宮殿以珠玳瑁飾之陳延壽作

諸淫巧日費數萬金宮城左右數十游幸嘗至月餘以豪民

為課戶供宴犒之費宋史劉

四年張大寶九年南海民妻生子兩首四臂歐史南漢世家

是歲尊南海神曰昭明帝廟曰聰正官十國春秋

五年張大寶十年造千佛塔於興王府十國春秋

先是廣州法性寺有菩提樹一株高一百四十丈大十圍傳

云蕭梁時西域僧真諦之所手植蓋四百餘年矣夏為大風

所拔是歲秋張之寢室屢為雷震識者知其必亡舊五代史劉鋹傳

開寶元年張大寶十一年鋹命範銅為己像并諸子於元妙觀未肖

者即殺治工凡三易乃成十國春秋

二年張大寶十二年六月癸未宋以右補闕王明為荆湖轉運使將

有事於嶺南也續通鑑長編

初宋師陷郴州獲南漢內品十餘人有余延業者人質也

麼宋太祖見之問曰爾在嶺南為何官對曰為扈駕弓箭

官乃授以弓矢延業極力控弦不開太祖笑因問本國政

事延業具言累世奢侈殘酷之狀太祖驚駭曰吾當救此

一方之民於是道州刺史王繼勳言劉鋹肆為昏暴民被

其毒又數出寇邊請王師南伐太祖猶未欲亟加以兵乃

命南唐主諭意令漢主先歸湖南舊地九月南唐主遣使

致書漢主不從續通鑑長編

謹案李煜嘗兩致書後主其初遣使無年月可考今

廬州府志卷之十一
從續通鑑長編錄於開寶二年後

三年

張大寶
十三年

八月南唐主復令知制誥潘佑作書數千言勸

漢主歸款於宋遣給事中龔慎儀來使漢主得書大怒遂囚
慎儀驛書答南唐主甚不遜南唐主以其書上宋太祖太祖

始決意伐之

續通鑑
長編

其書曰煜與足下叨累世之睦繼祖考之盟情若兄弟義
敦交契憂戚之患曷嘗不同每思會面而論此懷抵掌而
談此事交議其所短各陳其所長使中心釋然利害不惑
而相去萬里斯願莫伸凡於事機不得款會屢達誠素冀
明此心而足下視之謂書檄一時之儀近國梗槩之事外
貌而待之汎濫而觀之使忠告確論如水投石若此則又
何必事虛詞而勞往復哉殊非宿心之所望也今則復遣

人使罄申鄙懷又慮行人失辭不盡深素是以再寄翰墨
重布腹心以代會面之談與抵掌之議也足下誠聽其言
如交友諫爭之言視其心如親戚急難之心然三復其言
三思其心則忠乎不忠斯可見矣從乎不從斯可決矣昨
以大朝南伐圖復楚疆交兵以來遂成釁隙詳觀事勢深
切憂懷冀息大朝之兵求契親仁之願引領南望於今累
年昨命使臣入貢大朝大朝皇帝果以此事宜示曰彼若
以事大之禮而事我則何苦而伐之若欲興戎而爭我則
以必取爲度矣見今點閱大衆仍以上秋爲期合敝邑以
書復叙前意是用奔走人使遽貢直言深料大朝之心非
有唯利之貪蓋怒人之不賓而已足下非有不得已之事
與不可易之謀殆一時之忿而已觀夫古之用武者不顧

大小強弱之殊而必戰者有四父母宗廟之仇此必戰也彼此烏合民無定心存亡之機以戰爲命此必戰也敵人有進必不捨我求和不得退守無路戰亦亡不戰亦亡奮不顧命此必戰也彼有天亡之兆我懷進取之機此必戰也今足下與大朝非有父母宗廟之仇也非同烏合存亡之際也既殊進退不捨奮不顧命也又異乘機進取之時也無故而坐受天下之兵將決一旦之命既大朝許以通好又拒而不從有國家利社稷者當若是乎夫稱帝稱王角立傑出今古之常事也割地以通好玉帛以事人亦古今之常事也盈虛消息取與翕張屈伸萬端在我而已何必膠柱而用壯輕禍而爭雄哉且足下以英明之姿撫百越之衆北距五嶺南負重溟藉累世之基有及民之澤衆

數十萬表裏山川此足下所以慨然而自負也然違天不祥好戰危事天方相楚尙未可爭恭以大朝師武臣力實謂天贊也登太行而伐上黨士無難色絕劍閣而舉庸蜀役不淹時是知大朝之力難測也萬里之境難保也十戰而九勝亦一敗可憂六奇而五中則一失何補况人自以我國險家自以我兵強蓋揣於此而不揣於彼經其成而未經其敗也何則國莫險於劍閣而庸蜀已亡矣兵莫強於上黨而太行不守矣人之情端坐而思之意滄海可涉也及風濤驟興舟失馭與夫坐思之時蓋有殊矣是以智者慮於未萌機者重其先見圖難於其易居存不忘亡故曰計禍不及慮福之良以福者人之所樂心樂之故其望也過禍者人之所惡心惡之故其思也忽是以福或修

於慊望禍多出於不期又或慮有矜功好名之臣獻尊主
強國之議者必曰慎無和也五嶺之險山高水深輜重不
並行士卒不成列高壘清野而絕其運糧依山阻水而射
以強弩使進無所得退無所歸此其一也又或曰彼所長
者利在平地今捨其所長就其所短雖有百萬之衆無若
我何此其二也其次或曰戰而勝則霸業可成戰而不勝
則汎巨舟而浮滄海終不爲人下此大約皆說士孟浪之
談謀臣裨闔之策坐而論之也則易行之如意也則難何
則今荆湘以南庸蜀之地皆是便山水習險阻之民不動
中國之兵精卒已逾於十萬矣况足下與大朝封疆接眇
水陸同途殆雞犬之相聞豈牛馬之不及一旦緣邊悉舉
諸道盡攻豈可俱絕其運糧盡保其城壁若諸險悉固誠

善莫加焉苟尺水橫流則長堤虛設矣其次曰或大朝用
吳越之衆自泉州泛海以趣國都則不數日至城下矣當
其人心疑惑兵勢動搖岸上舟中皆爲敵國忠臣義士能
復幾人懷進退者步步生心顧妻子者滔滔皆是變故難
測須臾萬端非惟暫乖始圖實恐有誤壯志又非巨舟之
可及滄海之可遊也然此等皆戰伐之常事兵家之預謀
雖勝負未知成敗相半苟不得已而爲也固斷在不疑若
無大故而思之又深可痛惜且小之事大理固然也遠古
之例不能備談本朝當楊氏之建吳也亦入貢莊宗恭自
烈祖開基中原多故事大之禮因循未遑以至交兵幾成
危殆非不欲憑大江之險恃衆多之力尋悟知難則退遂
修出境之盟一介之使纔行萬里之兵頓息惠民和衆於

今賴之自足下祖德之開基亦通好中國以闡霸圖願修祖宗之謀以尋中國之好蕩無益之忿棄不及之爭知存知亡能強能弱屈己以濟億兆談笑而定國家至德大業無虧也宗廟社稷無損也玉帛朝聘之禮纔出於境而天下之兵已息矣豈不易如反掌固如泰山哉何必扼腕盱衡履腸蹠血然後爲勇也故曰德輶如毛民鮮克舉之我儀圖之又曰知止不殆可以長久又曰沉潜剛克高明柔克此聖賢之事業何恥而不爲哉况大朝皇帝以命世之英光宅中夏承五運而乃當正統度四方則咸偃下風獫狁太原固不勞於薄伐南轅返旆更屬在於何人又方且遏天下之兵鋒俟貴國之嘉問則大國之義斯亦以善矣足下之忿亦可以息矣若介然不移有利於宗廟社稷可

也有利於黎元可也有利於天下可也有利於身可也凡是四者無一利焉何用棄德修怨自生仇敵使赫赫南國將成禍機炎炎奈何其可嚮邇幸而小勝也莫保其後焉不幸而違心則大事去矣復念頃者淮泗交兵四疆多壘吳越以累世之好遂首爲厲階惟有貴國情分逾親驩盟愈篤在先朝感義情實慨然下走承基理難負德不能自已又馳此緘近奉大朝諭旨以爲足下無通好之心必舉上秋之役卽命倣邑速絕連盟雖善鄰之心期於永保而事大之節焉敢固違恐煜之不得事足下也是以惻惻之意所不能云區區之誠於是乎在又念臣子之情尙不逾於三諫煜之極言於此三矣是爲臣者可以逃爲子者可

宋史劉
張傳

附錄周必大二老堂雜誌云太祖皇帝命江南李煜作書論劉鋹煜命潘佑視草今藏之太祖實錄饒州董氏刻佑集亦有之然皆不載最後十句蓋私體不敢以聞也予隨侍至廣州得其全文其辭曰皇帝宗廟垂慶清明在躬冀日廣徽猷時膺多福徒切依仁之戀難窮報德之情望南風而永懷庶幾撫我指白日以自誓夫復何言

後主遣龔慎儀持書使南漢頃者大朝南伐圖復楚疆交兵以來遂成釁隙詳觀事勢深切憂懷冀息大朝之兵永契親仁之願引領南望於今累年昨命使臣入貢大朝大朝皇帝果以此事宣示云且彼若以事大之禮而事我我則何苦而伐之若與興戎而爭我則必以取為度矣見今大振師旅仍以上秋為期深料大朝之心非有惟利之貪蓋怒人之不賓而足下非有不得已之事與不易之謀殆一時之忿而已觀夫古之用武而必戰者有四父母宗廟之仇此必戰也彼此烏合民無定心存亡之機以戰為命

此必戰也敵人有進必不捨我求和不得退守無路戰亦亡不戰亦亡奮不顧命此必戰也彼有天亡之兆我懷進取之機此必戰也今足下與大朝非有父母宗廟之仇也非同烏合存亡之際也既殊進退不捨奮不顧命也又異乘機進取之時也既大朝許以通好又拒而不從有國家利社稷者當若是乎况大朝皇帝以命世之英光宅中夏方且遏天下之兵鋒俟貴國之嘉問則大國之義斯亦善矣足下之忿亦可息矣若介然不移有利於宗廟社稷可也有利於黎元可也有利於天下可也有利於身可也若一無利焉何用棄德修怨自生仇敵使赫赫南國將成禍機炎炎奈何其可嚮邇煜近奉大朝諭旨以為足下無通好之心必舉上秋之役雖善鄰之心期於永保而事大之

節焉敢固違恐煜之不得事足下也

東都事略

煜遣其臣龔正儀使於鋹遺鋹書曰僕與足下叨累世之盟雖疆畿阻闊休戚實同敢奉尺書敬布腹心昨大朝伐楚足下疆吏弗靖遂成釁隙初為足下危之今敝邑使臣入貢皇帝幸以此宣示曰彼若能幡然改圖單車之使造廷則百萬之師不復出矣不然將有不得已者僕料大朝之心非貪土地也怒人不賓而已且古之用武不計強弱小大而必戰者有四父母宗廟之仇一也彼此烏合民無定心二也敵人進不捨我退無守路戰亦亡退亦亡三也彼有敗亡之勢我乘進取之機四也今足下與大朝無是四者而坐受天下之兵決一旦之命有國家利社稷者固如是乎夫強則南面而王弱則玉帛事大屈伸在我何常

之有違天不祥好戰危事天方相楚尚不可爭而况今日之事邪地莫險於劍閣而蜀亡矣兵莫強於上黨李筠失守矣竊思足下國中必有矜智好謀之臣獻尊主強國之策以謂五嶺之險非可遽前堅壁清野絕其饒道依山阻水射以強弩彼雖百萬之兵安能成功不幸而敗則輕舟浮海猶足自全豈能以萬乘之主而屈於人哉此說士之常談可言而不可用異時王師南伐水陸並舉百道俱進豈暇俱絕其饒道盡保其壁壘或用吳越舟師自泉州航海不數日至足下國都矣人情洶洶則舟中皆為敵國忠義效死之士未易可見雖有巨海孰與足下俱行乎敢布腹心惟與大臣熟計

南唐書

謹案王偁東都事略李燾續通鑑長編並云兩致鋹

書據宋史書詞云復遣人使聲伸鄙懷又慮行人失辭不盡深素是以再寄翰墨重布腹心云云乃第二書也南唐書東都事略所載皆第二書節本其第一書今無可徵矣茲備錄各書所載以備參檢又考陸游南唐書遣龔慎儀事凡兩見後主紀在乾德四年慎儀傳在開寶三年然則將命殆俱慎儀也

九月命潭州防禦使潘美為貴州道兵馬行營都部署朗州團練使尹崇珂副之遣使發十州兵會賀州以伐南漢宋史太祖紀

師至白霞賀州刺史陳守忠告急於鋹是時舊將多以讒構誅死掌兵者惟宦人自晟以來城壁濠塹多飾為官館池沼樓艦皆毀兵器又腐內外震恐乃遣龔澄樞往賀州

郭崇岳往桂州李託往韶州美與崇珂圍賀州澄樞遁歸鋹遣伍彥柔領兵赴賀美等擒斬之美等督戰艦聲言順流趨廣州鋹令潘崇徹將兵屯賀江宋史劉鋹傳

是月廣州民見眾星皆北流知星者言劉氏當舉國歸中原之兆文獻通考

十二月韶州陷鋹始塹廣州東濠遣郭崇岳統兵屯馬逕列柵以拒宋史劉鋹傳

四年鋹大寶十四年春正月潘美克英雄二州二月克廣州擒劉鋹廣南平得州六十縣二百十四東都事略

潘美等取英雄二州都統潘崇徹來降師次瀧頭鋹遣使請和瀧頭山水險惡美等疑有伏兵乃挾鋹使速度諸險二月過馬逕去廣城十里砦於雙女山下鋹取船舶十餘

艘載金寶妃嬪欲入海未及發宦官樂範與衛兵千餘盜
船舶走美等將至張懼遣其右僕射蕭濯奉表乞降又遣
其弟保興率百官奉迎為郭崇岳所遏美等乃進攻城破
張盡焚其府庫美擒張及龔澄樞李託薛崇譽與宗室文
武九十七人縻於龍德宮保興逃於民家獲之悉送闕下

宋史劉
張傳

是時有宦者百餘輩盛服請見美曰是椽人多矣吾奉詔
伐罪正謂此等悉斬之

十國
春秋

嶺南道行營擒劉張露布嶺南道行營都總管潘美副總
管尹崇珂都監朱憲等上尙書兵部臣等聞飛霜激電上
帝所以宣威伐罪弔民明主以之耀武國家仰稽元象大
啟鴻基將復三代之土疆永泰萬方之生聚西平巴蜀雲

雷敷潤物之恩南定衡湘江漢鼓朝宗之浪惟嶺南之狹
俗獨恃遠以偷安久背照臨罔遵聲教偽漢國主劉張性
惟兇忍識本庸愚以虐害為化風以誅戮為政事置火牀
鐵刷之獄人不聊生設剉確湯鑊之刑古未曾有恨刀鋒
之未快用鋸解以恣情鬻割刳屠窮彼殘害一境告天而
無路生民何地以稱冤衆心向明如望皎日我皇帝仁深
恤隱義切救焚遂發干戈拯其塗炭臣等上憑神武遙稟
睿謀舉軍未及於半年乘勝連收於數郡累逢戰陣無不
掃除劉張遠懼傾危尋差人使初則稱臣上表具陳歸化
之心後乃設詐藏奸翻作款兵之計臣與將士等仰承睿
旨不敢逗留於正月二十七日已到柵口去廣州只及一
程劉張又頻發佐僚來往商議漸無憑準固欲淹延兼於

諸處收到新出偽命文榜皆是會合逆黨拒敵王師至二月四日果遣其弟保興等部領舉國軍兵併來決戰臣等憤其翻覆惡此狂迷尋結陳以交鋒復揮戈而誓衆行營將士等感大君之撫馭咸願竭忠怒逆寇之拒張爭先効命八十里鎗旗競進數萬人殺戮無遺尋又分布師徒徑收賊壘其劉鋹知城隍之必陷將府庫以自焚烈焰連天更甚崑岡之火投戈散地甘從涿野之誅劉鋹則尋便活擒廣州則當時平定其在州官吏僧道軍人百姓等仁除苛虐咸遂生全無不感帝力以霑襟望皇都而稽首此蓋天威遠被宸算遐敷平七十年無道之邦救百萬戶倒懸之命殊方既乂長承日月之迴光鴻祚無疆永荷乾坤之降祐其劉鋹并偽命判六軍十二衛劉保興太師潘崇徹

玉清宮使左龍虎軍觀軍容使內太師龔澄樞列聖宮使六軍觀軍容使內太師李託內門使驃騎大將軍內侍中薛崇譽等朋助劉鋹旅巨生擒合同俘獻臣等幸陪戎事倍樂聖功無任快抃歡呼之至謹奉露布以聞

宋文鑑

謹案長編云辛未克廣州按是年二月丁卯朔則辛未爲初五日也薛史云二月五日王師壓廣州南海百詠引劉氏興亡錄云二月辛未偽劉少主迎大軍於城北七里潘美令中貴宣赦釋罪云云俱與長編合宋史太祖紀云己丑克廣州特據奏到之時言之耳玉海云庚午克廣州東都事略又云丁亥克廣州疑當有誤

辛卯赦廣南

東都事略

赦廣南管內州縣常赦所不原者偽署官並仍舊無名賦

歛咸蠲除之除開寶三年以前逋租民饑者發廩賑之諸

軍俘獲悉還其主縱遣劉鋹父祖守墳宮人俊士奇才所

在詢訪修辭挺節恥事偽邦者長吏以名聞祠宇邱壟悉

加營護續通鑑長編

三月詔嶺南諸州長察偽政有害於民者以聞當悉除之續通鑑長編

詔廣南有買人男女為奴婢轉傭利者並放免偽政有害於

民者具以聞除之宋史太祖紀

四月詔禁嶺南商稅鹽麴宋史太祖紀

五月俘鋹至京師續通鑑長編

鋹至江陵邸吏龐師進迎謁學士黃德昭侍鋹鋹問師進

何人德昭曰本國人也鋹曰何為在此曰先主歲貢大朝

輜重至荊州令師進置邸於此造車以給饋運爾歎曰我

在位十四年未嘗聞此今日始知祖宗山河及大朝境土

也泣下久之宋史劉鋹傳

鋹至京師舍於玉津園宋太祖遣參知政事呂餘慶劾問

翻覆及焚府庫之罪後主歸罪於龔澄樞李託薛崇譽太

祖復遣使問澄樞等此誰之謀皆俛首不對諫議大夫王

珪謂託曰昔在廣州機務並爾輩所專火又自內中起今

尚欲推過何人遂唾而批其頰澄樞等乃引伏五月乙未

朔有司以帛係後主及其官屬先獻太廟太社太祖御明

德門遣攝刑部尚書盧多遜宣詔詰責後主後主對曰臣

年十七僭偽號澄樞等皆先朝舊人每事臣不得自由在

國時臣却是臣下澄樞等却是國主對訖伏地待罪太祖命攝大理卿高繼申引澄樞託崇譽斬於千秋門外釋後

主罪及其官屬禎王保興各賜以冠帶器幣鞍馬續通鑑長編

六月壬午授張金紫光祿大夫檢校太保右千牛衛大將軍

員外置同正員封恩赦侯朝會班上將軍之下宋史劉張傳

賜張月奉外錢五萬米麥五十斛太祖紀

壬申初置市舶使於廣州黃通志

令海舶歲入象犀珠寶香藥黃通志

十月除廣南舊無名配斂甲放廣南民毆充軍者太祖紀

五年五月賜劉錕錢一百五十萬太祖紀

罷嶺南採珠都卒為靜江軍太祖紀

張置兵八千專以採珠為事曰媚川都以石礮其足入海

而盡藝祖廢媚川都黥其壯者為軍老者放歸田里不得

以採珠為業於是俗知務農矣王闢之澠水燕談

六年七月減廣南無名率錢太祖紀

七年四月遣使檢嶺南民田太祖紀

八年詔嶺南盜賊滿十貫以上者死太祖紀

廣州言前詔竊盜至死者奏裁嶺南遐遠覆奏稽滯請不

俟報帝惻然曰海南習俗貪獷穿窬固其常也因詔嶺南

民犯竊盜賊滿五貫至十貫者決杖黥配十貫以上乃死

刑法志

十月廣州颶風大雨水起一晝夜雨水二丈餘海為之漲飄

失舟楫宋史五行志

十二月以恩赦侯劉錕為彭城郡公太祖紀

九年銀進封衛國公續通鑑長編

謹案宋史世家云太平興國初進衛國公與此不合蓋其時太宗雖即位而未改元也

太宗太平興國二年七月廣州獻芝草宋史五行志

三年正月知廣州李符獻海外諸域圖嶺表花木圖玉海

四年八月廣州獻芝草宋史五行志

五年三月左監門衛上將軍劉鋹卒追封南越王宋元通鑑

鋹體質豐碩眉目俱竦有口辨性絕巧嘗以珠結鞍勒為戲龍之狀極其精妙太祖以錢百五十萬給其直謂左右曰鋹倘能以習巧之勤移於治國豈至滅亡哉太祖幸講武池賜鋹卮酒鋹疑為醜泣曰臣承祖父基業違拒朝廷罪固當死陛下不殺臣今見太平為大梁布衣足矣未敢

飲此酒帝大笑曰朕推心於人腹安有此事取酒自飲別酌以賜鋹大慚頓首謝太宗將討晉陽召近臣宴鋹預之言朝廷威靈四方僭竊之主今日盡在坐中旦夕平太原劉繼元又至臣率先來朝願得執挺為諸降王長太宗大笑賞賜甚厚其詼諧皆此類也續通鑑長編

南海譚宗浚分纂

南海梁

起初校

順德盧乃潼再校

番禺史悠履三校

順德羅

槩四校

廣州府志卷七十六終

